


944.9 A931H v.4 c.1

Aurore, J.

Histoire critique de la ren

R.W.B. JACKSON LIBRARY

OISE CIR



3 0005 02023 5001

THE LIBRARY

The Ontario Institute
for Studies in Education

Toronto, Canada



LIBRARY

NOV 24 1970

THE ONTARIO INSTITUTE
FOR STUDIES IN EDUCATION

J. AUROUZE

DOUTOUR EN LETRO

LOU

PROUVENÇAU

À

L'ESCOLO

TÈSI PÈR LOU DOUTOURAT

PRESENTADO

DAVANS LA FACULTA DI LETRO DE L'UNIVERSITA D' AIS-MARSIHO



VILO-DIÈU
EMPRESARIÉ PROUVENÇALO
(Vau-Cluso)

AVIGNOUN
LIBRARIÉ J. ROUMANILLE
19, carriero St-Agricò, 19

1907

944.9

A931H

v.4

Milane, 22 janvier 1907

mon cher ami, je viens de terminer
la lecture de votre « Histoire critique
de la Renaissance méridionale au
XIX^e siècle », et je vous envoie
mes félicitations et mes remerciements.
j'ai revu là, comme d'un sommet
de montagne, toute la chaîne, j'ai vu
depuis cinquante ans pour l'idée
félibréenne et j'ai été moi-même
étonné de la grandeur de l'œuvre,
de l'œuvre s'élevant et accomplie au
souffle de nos enthousiasmes de
jeunesse : vous avez clairement démontré
la puissance d'un rêve de poète,
quand ce rêve est grand, quand

Ce l'ère est conduit par une foi
sincère et dans les conjonctures graves
à son développement. par votre
situation de gouverneur de race, d'avoir
gagné par sang et de clairvoyance
lettré, vous êtes placé à merveille
pour juger le combat et apprécier
l'effort. or le seul résultat d'avoir,
après tant d'années et de discussions
incertaines, obtenu les sympathies
de l'opinion d'être par soi le maître,
c'est pour nous la bénédiction de
la victoire définitive.

~~un bon sera le~~
votre ouvrage sera le mémorial
du Filibuste, avec ses camps, avec
ses graves, avec ses faits les plus

naïvement, et on pense y vivre,
éteindre par éteindre, ce très intéressant
et très charmant réveil de l'âme
provenant au dix-neuvième siècle.

Bien que blasé sur toutes
ces choses, jusqu'à elle, pour partie
de ma vie quotidienne depuis un
demi-siècle, j'ai pris un grand
plaisir à les voir coordonnées,
enchaînées et déduites, comme les
épisodes d'une légende dorée
ou d'une histoire héroïque.
il est vrai que j'en ai tiré le rôle
général, que vous m'avez prêté
pour du long, à peu influencé
mon opinion personnelle. mais j'en

Je pense à croire que les juges
de votre thèse, en votre université
d'Aix, seront heureux de la con-
férer.

Je vous, mon cher docteur,
le premier bris de palmier - que
de bon cœur je vous donne,

F. Mistral

à M. V. Durange, docteur
ès lettres

À

L'EGRÈGI PROUFESSOUR

EN LEOUPOLD CONSTANS

CRÉATOUR À 'Z-Ais

DE LA CADIERO

DE LENGO E LITERATURO MIEJOURNALO

• L'ÓUMAGE

DE LA PROUMIERO TÈSI

PROUVENÇALO



AVANT-PROPOS

On se demandera peut-être pourquoi nous avons écrit cette étude en langue provençale.

C'est la première fois, en effet, que dans l'Université de France on voit paraître une thèse écrite dans une langue parlée pourtant par le tiers des Français.

Le 28 Juillet 1903, M. Chaumié, ministre de l'Instruction Publique, promulguait un décret portant que désormais « la deuxième thèse, qui peut être un mémoire ou un travail critique, sera rédigée soit en français, soit dans une des langues anciennes ou modernes enseignées à la Faculté. »

L'Université d'Aix-Marseille, qui se fit toujours remarquer par son intelligente initiative, saisit avec bonheur l'occasion de se mettre à la tête d'un mouvement nouveau, en nous demandant, elle-même, d'écrire notre seconde thèse en provençal.

Pour obéir à l'esprit du programme ainsi qu'à une tradition qui, sans être absolue, est pourtant généralement suivie, nous avons donné à ce travail des proportions volontairement restreintes.

Le génie du provençal nous invitait d'ailleurs à envisager plus spécialement la question par le côté géné-

ral et extérieur et à la traiter dans un style à la fois simple et imagé.

Le sujet nous paraissant mériter une plus profonde étude et de plus amples développements, nous l'avons repris en français, dans un ouvrage plus technique et plus étendu, où nous avons multiplié les exemples, les notes, les documents et qui forme le III^e volume d'une suite continue, sous ce titre général :

HISTOIRE CRITIQUE
DE LA RENAISSANCE MÉRIDIONALE

AU XIX^e SIÈCLE

I^{er} volume : LES FAITS, Exposé historique.

II^{me} volume : LES IDÉES DIRECTRICES. Etude critique.

III^{me} volume : LA PÉDAGOGIE RÉGIONALISTE.
Les parlers locaux dans l'Enseignement.

PROUMIERO PARTIDO

L'Escolo au XIX^e siècle

CHAPITRE I

SI PRINCIPE PROUMIEREN

Entre lou grouïn d'idéio mougudo pèr la Reneissènço Miejournalo, nous es eici mestié d'estudia li qu'an raport à l'Educacioun.

Mai, peravans de parla di reformo que prepauson de faire li Regiounalisto dins lou sistèmo atuau, es necite d'eisamina li principe que mestrejon l'Ensignamen, tau qu'es dounà à l'ouro de vuci, tout coume peravans d'inserta 'n aubre, fau counéisse soun essènci e saupre la naturo de la frucho que douno.

Ço que fai l'esperit e ço que coustituïs li foun-

damento di prougramo escoulàri, es pas tant ço que countènon, coume lis idèio soucioulougico que n'en soun l'amo.

Aquélis idèio s'apielon éli-memo sus quàuqui principe filousoufi.

Despièi Socrate enjusqu'à Rabelais, Montaigne e J.-J. Rousseau, s'es toujour di de desvouloupa l'enfant dins lou biais que demando sa naturo.

Estènt, aquel assiomo, ansin pausa, s'agis de vèire coume aquèsti darrièr siècle an coumprès la naturo de l'ome.

Lou siècle XIX^{en} a gaire viscu, coume lou XVIII^{en}, que di teourio d'ou *Contrat Social* e di *Déclarations des Droits de l'Homme*.

Rousseau a vist dins l'ome que l'esperit unen, interiour, sèmpe lou meme, souto tóuti li cèu, dins tóuti li pople. Sa filousoufio es censamen touto aquí.

La Revoulucion faguè rên mai que la segui, en prouclamant l'Egalita e la Liberta de tóuti.

Partènt d'ou principe majour que tóuti lis ome soun parié e libre, èro de bon de li prepara, tóuti parieramen, à-n-emplega 'quelto liberta.

Es ço que la Revoulucion òublidè pas. Li discours de sis ouratur, coume Talleyrand-Perigord, e li plan d'educacion d'ou counvencionau Lepelletier, pèr parla que d'aquéli, n'en fan la pròvo.

L'idèio èro pivelanto, mai sa realisacioun èro poussiblo qu'emé de grand desavèni.

Tóuti lis ome estènt libre e arma parié pèr la vido, devien fatalamen s'embriaga d'ou desir de la batèsto.

Pèr courregi lou mal-adoubat, la Révoulucioun piquè lou rampèu i sentimen souciau dis indiyidu : à la Liberta em' à l'Egalita, jounneguè la Fraternita.

Pèr tóuti lis age de la vido, pèr tóuti li meno de situacioun, istituiguè de fèsto. Coungreie la Religioun de l'Umanita. Faguè l'unita de la patrio dins la prouclamacioun de la Republico uno e indivisiblo.

L'educacioun, desenant, se douné em' uno estigance nouvello. Pèr rèndre lou nouvèu regime unen e parié dins tout lou païs, sùs touto la Franco se tiré 'n grand cop de nivèu e se passé 'no largo rasouiro qu'empourté li tradicioun, l'istòri e li parla regiounau.

Dins uno nacioun ounte s'èro decreta em' estrambord la Liberta e l'Egalita, vouguèron, lis ome de la Révoulucioun, que l'aguèsse qu'uno lengo unenco, entendudo de tóuti.

Li proumiés ate óuficiau porton qu'aquéu souvèt.

Li Jacoubin, regardant la lengo di prouvinço

coume lou simbèu d'ou passat, travaïeron à la foro-bandi.

Grégoire cridavo dins la tribuno de la Councioun : *La Fèudalita a garda preciousamen la diferènci di parla pèr miès encadena li sèrvi ; se voulès la liberta, li fau bouta tóuti deforo.*

Em' un partamen d'idèio diferènt, Napoléon prenguè aquéli teourio pèr n'en faire un meraviheus mecanisme de centralisacioun.

CHAPITRE II

SO'UN PROUGRAME

Aquelo espinchounado à-rèire, sus lis idèio de touto uno epoco de nouvelun, pòu adeja nous faire devina lis aplicacioun pratico que se n'es fa.

Lou prougrame d'aro, parié pèr tóuti li Francés de Franço e de Navarro, tè'n pas mai comte di raço que dis endré, di caratère dis ome que de soun èime ancestrau.

Sèns cregnenço de passa l'osco, se pòu afourti que vuei, à la memo ouro, au meme son de campano, s'escriéu, dins tóuti lis escolo, la memo ditado e s'apren la memo leiçoun.

Pèr èstre miés assegura que la memo sciènci es coumunicado en tóuti, clafisson aro li prougrame óuficiau, aplica souto l'ive regardant dis ispeitour, d'uno encicloupedio tant aboundouso que la tèsto di pàuris enfant ié pòu plus teni.

De qu'aribo alor? Dins la pratico d'aquéli prougrame s'atrobo mai de dificulta que d'interès, se bourro forço mai la memòri que ço que se

desvouloupo l'inteligènci, e dins l'escourregudo folo à travès d'aquéli matèri, tèn pèd quau pòu.

La lengo naciounalo, naturalamen, l'ès à la plaço d'ounour. La majo part d'òu tèms passa dins li classo primàri es counsacrado à la leituro e à l'escrituro de la lengo franceso.

Acò sarié bèu e bon, e degun troubarié à redire, se l'estrucioun d'aquelo lengo coumpourtavo pas la destrucioun dis outro.

Li prougramo òuficiau, pèr dire lou verai, se n'en tènon à-n-ignoura li dialèite, mai cadun saup que lou zèle destempoura de quàuquis istitutour i'a fa fourça la rego.

Se cresènt, ni quant vau, ni quant costo, que lou parla di prouvinço degaio lou francès, se soun òpila à-n-arranca e à-n-escarni la lengo que l'enfant adus à l'escolo.

A-n-aquéu qu'èro sousprés parlant la lengo de si paire, dounavon « un signe », qu'èro, quouro uno titèi, quouro uno goubiho, e quouro tambèn uno roundello de ferri, vejaire meme un esclop! L'enfant devié garda bèn en visto aquéu signe, coume uno marco de desounour, e tant lèu que poudié, lou baia au proumié qu'entendié parla coume éu avié fa.

Ès-ti besoun de dire ço qu'un parié proucedimen avié d'inmourau? Quet ensinamen, à l'es-

colo meme, de faire ana l'enfant d'escoutoun, de lou dreissa au triste mestié de raporto-me-lou!

Mau-grat tóuti lis esfors coustié, l'escoulán, tant-léu deforo, tourno mai parla la lengo de sa maire, la souleto que responde à l'espandimen de soun amo, la souleto que coumprenque e que parle eisadamen.

Segur, l'escolo primári fai pas tant de tort que la salo d'asile.

A l'escolo, l'enfant ié vai jamai avans cinq o siéis an. A lou tèm enjusqu'aquí, sus li geinouï de sa maire e tre que sa lengo se desligo, de bresilha lou parla gènt de l'oustau, de pensa, de senti, emé la fibro novo de l'enfanço, coume si parènt, coume si rèire.

Mai se lou nistoun qu'à peno se tèn dre e que tout-béu-just lalejo, es embarra dins l'asile, es noun soulamen desmama, mai coume despatria. Adieu lis impressioun flourido qu'enlusirien pu tard si pantai! Sentimen escrèt dóu parla de la raço, di tradicioun de la famiho, vous pourtarés bèn!

Despoutenta pèr de vènt countrári, saup plus, lou paure agnèu, ounte ana faire tèsto. Es tout abalausi, e, proubable, lou restara touto sa vido.

La fauto, la fauto grando, (ai! las, trop souvènt inevitablo), es à la maire qu'abandouno en d'au-

tre lou pu agradiéu de si devé, à-n-elo que, sènso grevanço, laisso anequeli l'èime de soun enfant e trenca dins sa jouino memòri lou racinun fegound de la lengo dóu terraire.

Quouro sara grand, basto n'en vèngue pas, lou pichot francihot que se creira 'n moussu, enjusqu'à mespresa soun èndré, soun oustau e sa maire!

E vous cresès pas qu'ansin fagon, si gènt, uno obro de malur?...

CHAPITRE III.

SI RESULTAT.

Se voulèn saupre li resultat d'aquéu sistèmo d'educacioun, es pas dins li teourio que nous li fau cerca, mai dins la pratico.

Veguen un pau ço que n'es de l'enfant quouro l'an pāncaro esquicha dins lou mole uniforme e gēnerau, o quouro, pēr bonur, se n'en pōu un moumen tira.

A soun oustalet, tout bēu just cargo si premiēri braieto, que counēis deja lou noum de tōuti li causo dōu meinage, di bēsti, di recordo, di vēnt, etc., etc... Saup ço qu'es besoun de dire quouro vōu manja, quouro vōu jouga. D'istint, mounto de soun cor à si labro lou noum de tōuti lis ōujēt, e soun esperit se duerb sēnsō esfors, souto l'aflat de la naturo.

A l'escolo, dōu tēms que se jogo, es dins lou parla meirau que lou pichot levēnti fai soun ramage. Oh! li galant conte, li poulidi sourneto que saup dire dins aquelo lengo luminouso que

ramento tout l'eime, touto la vido galoio d'uno raço !

Lou que jogo au sòdard, beilejo, coume un counquistaire, soun bataioun enebria, en ié fasènt, d'uno voues que tremolo gaire, li pus ufanóusi prouclamacioun.

Mai, dinde la campaneto !

Ai ! las, coume aquéu bèl estrambord subran se vai amoussa !

Lis enfant s'assèton dins la classo. La leiçoun coumenço. Se vai parla de boutanico. Šus lou tablèu negrè, lou mèstre a marca, *en francès* : de faiòu, de pese, de civado, d'esparsset, etc... Sara pàs empacha, dirès, lou brave escoulan, pèr parla de tout acò : vint cop dins l'estiéu, aquéli recordo i'an passa entre man.

Mai, lou vaquique noun muto ! Rèsto nè, bouco badanto, cabesso vuejo. Aquéli mot francès revihon pas dins sa memòri lou mendre souveni, e li causo que pènso en prouvençau, se vèi que lou paure li pòu pas espremi dins uno lengo qu'es pas dins sa naturo ni-mai dins soun usage.

L'enfant es entre-pres pèr parla, me dirès ? Fasès-lou escrièure : sara bèn pire ! Atroubara que d'idèio estrechouno, seco, malautouso ; si fraso saran adoubado emé de mot aligna à l'asard,

coume un bataioun de reservisto e qu'emplegara de souveni, sènso bèn saupre ço que volon dire.

N'en veici 'n eisèmples que nous semound lou fraire Savinian. Es lou travi d'un bon elève d'uno escolo primàri d'Ayignoun, en quau s'èro douna pèr sujet : « *Avignon au point de vue physique, commercial et historique.* »

« Il y a sur le Rocher un lac d'eau où nagent des cygnes et des canards ; il y a la Banque où l'on donne et où l'on tire d'argent ; la statue de Crillon qu'Henri IV lui écrivit lorsqu'il combattait à Arques ; il y a la Commune où l'on va se faire inscrire quand on est né, quand on se marie et quand on est mort ; la grande carrière qui mène de la gare à la place du Reloge. Dans Avignon la fabrique de velours de la rue Velouterie, il va plus. La garance il va plus, et la vigne il donne plus de raisins. »

Aquelo pajo ounte, (remarquon-lou en passant), se devino pas uno soulo fauto d'ourtougrafi, mostro miès que tóuti li resounamen, lou defaut d'uno metodo qu'apren tout-béu-just à-n-abiha li mot à la franceso, sèns esplica la valour ni-mai la plaço que chau de ié douna.

Dins tóuti li raport dis ispeitour se pòu trouba semblablo noto.

Lou malur es que lou mèstre d'escolo, venènt

de Paris o...d'Auriòu, douno toujours en bèu francès touti si leiçoun, sènso voulé saupre ni crèire qu'èisisto dins lou païs, ounte l'asard l'a mena, uno outro lengo, touto lèsto à ié presta soun ajudo, pèr durbi l'inteligènci de sis escoulan.

Dins l'ignourènci qu'es éu-meme, de touti li causo de l'endré, jamai fara counèisse à l'enfant la terro siéuno, jamai ié dira l'istòri di grands evenimen, di glòri e di tourment d'ou païs que l'a vist naisse. Ié parlara que de la grandò França, de l'Europo, de l'Americo, qu'acò 's de moussèu bèn gros pèr la pichoto tèsto de l'enfant.

Oublija de charra 'n francès de ço que coumpren qu'à mita, e bèn proun, l'enfant parlara mai de memòri que d'inteligènci e de refleissioun.

l'a de mot, dins cado lengo, que soun coume li mirau beluguejant d'idèio requisto : se matrassas aquéli mot, lou mirau s'embrunis e l'idèio s'esvalis.

Mai que d'un cop, lou pichot d'ou masié o d'ou meïsterau que vai à l'escolo, l'apren tout-bèu-just à-n-estoufa soun biais naturau de pensa, de senti, pèr ié gagna qu'uno estiganço artificialo que de ges de façoun pourra s'endeveni emé l'èime de sa vido.

Enebi à l'escolo ço qu'es la fundamento de l'oustau, es gasta la naturo e desavia la raço.

La counseuqènci de tout acò sara que l'enfant amara pas l'escolo : à la sourniero, entre éu e lou mèstre se cavo un vabre que vai de-longo en s'aprefoundissènt, e que se sarié pas fourma se l'un e l'autre èron esta de memo souco e de memo lengo.

A l'oustau, lou drole que revèn fièr de saupre de bèu mot à la modo de Paris, regardo d'aut tout ço que retrobo. La croio que raporto i'a endurci lou cor. La douço pouësio qu'enlusicuè sa primo jouvènço ié dis plus rên. A perdu lou clar tresor di remembranço. Lou vèsti de sa maire ié fai crento e soun parla tant gènt ié sèmblo plus qu'un lengage groussié, bon tout-bèu-just à leissa au degai.

Dins la vido, qu'es la countinuacioun de l'escolo, de-que se passo?

Lou proumié travai dóu jouvènt que retorno à la terro o que rintro dins un ataié, es d'oublida lou pessu d'istòri, de geougrafio, de literaturo franceso qu'a acampa emé tant de peno, sus li banc de la classo. Juste retour di causo : de l'estrumen estrangié que i'an mes entre li man, de la lengo óuficialo, se n'en saup pas servi.

Se, pèr cas, se rescontro que ié vèngue à l'idèio de faire de bèlli fraso, o simplamen de s'espremi

en francès sus li causo usualo, lou vaqui qu'em-bastardis li dos lengo en lis estroupiant l'uno e l'autro d'un biais boufoun :

« Nautre, le mars, disié 'n païsan après vendémi, nous le laissons pas dégayer : nous en fasons d'arcol ; pour gaubéjer l'arcol, nous n'en fasons de chastreuse et, nous se f...ons de la rézie. »

E que degun crèigue que cargan la rego à plesi. Nàni, acò 's la coustatacioun que tout lou mounde pòu faire, e pertout, e tóuti li jour. Tout lou mau vèn de la counfusioun de dos lengo d'engèni diferent que, tèsto aqui, li mèstre volon pas faire aprendre pèr coumparesoun.

Basto tout aquéu bèu tèms qu'a passa à-n-estudia, touto aquelo peno qu'a presso, ague pas servi qu'a leva à l'escoulan la resoun e lou bon sèns !

Ié parlés plus au pichot saberu dòu mestié tranquile e san de si gènt. Lou veirés plus travaia dins li mas o dins li boutigo, tant es mountado sa croio e dessonado sa cujanço.

Li béus enfant dóu pople, souvènt forço inteli-gènt, qu'aurien pouscu rendre li meiour service à l'art de soun païs, trobon la terro trop basso e l'outis trop lourd.

Enfada pèr li mèstre d'escolo que se n'en volon

faire un sujèt de glòri, un titre d'ounour, passon sis eisamen e pièi... van bousca uno pichoto plaço d'espèdiciounàri dins quauque burèu. Em' acò lou raïve es realisa, la *pousicioun* es troubado.

Pecaire ! paure pichoun, de qu'an fa de tu, de ta resoun e de ta liberta ?

Adiéu lou sant soulèu di garrigo ! Adiéu l'èr pur que te gounflavo lou pitre ! Adiéu li cansoun de la libro calandro sus lou vaste campèstre ! Adiéu l'ampLOUR de la vido simpla e largo e sanitouso ! Desenant, à tu lou jour gris e mau-san, darriè l'agachoun d'uno banco. A tu la ribambello di secutaire que te tiraran dessus coume su 'no bèsti, te prenènt ti jour, ti niue, li tres quart de toun eisistènci. Assanca souto la joko que te plego en dous double, crido toun hosanna, car as avera toun pountificat : as un abihage de vilo e siés plus païsan !

Ai las ! costo mai que l'on se crèi pèr faire soun pichot moussu ! Fau souffri pèr èstre bèu ! Encaro se se patissié que fisicamen, basto ! Mai lou mourau, éu tambèn, es ataca, chirouna, gasta. Quant se n'es vist de malurous, desavia, lou vèntre à l'espagnolò e l'esperit desgounfouna, chanja e rechanja vint cop de mestié. Douge mestié, trege misèri ! Desmama de soun-païs e de si gènt, la vido i'es plus qu'un long suplice, e, se nouu cabusson

dins lou vice, s'acaminon de descasènço en descasènço vers la mort anounimo dins quauqu'espitau.

De tout caire se clamo lou paro-garo contro lou mau : li masage enermassi se despoplou e li vilo regounflon ; li bèlli raço forto d'ome libre s'aflaquisson, lis enfant malautejon e toumbon flour !

Despatria, lou païsan devengu oubrié dins la grand vilo, atroubant plus, dins un marrit oustau sènço soulèu e sèns enfant, de que recaliva soun amo e alegra soun cor, s'en vai nega si trànsi dins li bar e li café. Aqui rescontro de coumpagnoun d'infourtuno. Buta pèr la misèri, entahina pèr l'aigo-ardènt, éu, lou tranquile enfant de mas, enjalousi pèr lou lüssi e l'ufano que l'espouscon dins li carriero, vèngue un marrit vènt, s'eirissara terrible e mourtau.

Vaqui lou sourne garagai, lou cadarau fatau ounte meno invinciblamen uno estrucioun facho à rebous de péu. Pèr un qu'escapo, pèr un que trachis, cènt, milo rèston en bataio, cènt, milo perisson.

E zòu ! gounflas-lèi de vanita ! E zòu ! bourras-lèi de croio ! E zòu ! fasès-ié 'ncreïre qu'em' un certificat d'estùdi primàri faran mirando dins lou mounde ! Lou premié pas foro l'escolo, lou premier afrountamen emé la vido vidanto sara proun

fort pèr vous li desgounfla, pèr vous li vuja, pèr bouta à-noun-rèn vòsti bèlli proumesso.

Ai ! las, li doucumen vivènt mancon pas, i'a que de se clina pèr n'en prendre. Mistral n'aguènt culi sus plaço un di mai significatièu, de la bouco innoucènto de dous enfant de mas, dins li Jardin Sant-Roumjèren, disié dins soun discours de Santo-Estello en Avignoun :

« Estounas-vous après, — d'abord que nòsti jardin agradon plus à si jardiniero, — que tant de bêu pessègue se degaion sus planto, que i'ague tant de chato que se maridon pas, que lou terraire se despople, e que, pèr uno lèi invinciblo, e fata!o, vèngon li Piemountés, li Genouvés, lis Italian ramplaça dins Prouvènço lis enfant de la terro que volon plus la boulegà, li fièu di pescadou que volon plus prene la mar, li cago-nis di mesteirau que volon tóuti èstre moussu ! »

CHAPITRE IV.

SI DECO.

L'enseignamen, tau que se douno à l'ouero d'aujourd'uei, manco pas de defaut dins si principe e sis aplicacioun.

Li signalaren sènso charpina. Li pu serious partisan de l'Universita soun-ti pas li bêu proumier à remicuta contro lou sistèmo que chascun voudrié redreissa ?

Li principe de l'educacioun ouficialo soun aquéli de la Revoulucioun: Liberta, Egalita, Fraternita.

Acò, segur, es mai que bêu coume toco. Lou malur es que l'an pres coume partènço.

S'es di en 89, que tóuti lis ome èron parié.

Es-ti vrai ? que tóuti lis enfant naisson *egau* ?

La naturo elo-memo sèmblo dire de noun. N'en fai de touto merço, de blound, de mouret, d'inteli-gènt, de nèsci, de doucile, de mutin, de riche, de paure.

Arribon-ti parié à la porto de l'escolo ?

Nàni, cadun ié vèn emé soun èime, soun biais,

sa santa, sa vounta, e tout acò, fau bèn que se n'en couvèngue, es forço diferènt dis un is autre.

Es que sarié bon de douna 'n tóuti meme vièure, meme travai, meme atrinage ?

Faudrié rên entendre i necessita de la naturo, i dispousicioun dis inteligènci.

E vous cresès que sarié forço agradiéu un pople de gènt tóuti estampa sus la memo maire ? Nautre lou pensan pas.

Pèr faire un poulit jardin fau de flour de touto meno e de touto coulour. Eh ! bèn, leissas-lèi grana e escampilhas li grano, entre-mescle, veirés se, l'an venènt, cado semenço adus pas tourna-mai la flour de soun espèci.

Dins un bos, avès bello à cepa, au meme canage, roure vigourous, pibo gréule, roumanin nanet ; enterin que lou pibo enança vers lou soulèu si lóngui verguello e que lou roure escaraiara soute la capo dóu cèu si branco rufo e gaiardo, sèmpre, ras de sòu, lou roumanin de gres agrupelara si tousco redoulènto.

Es que lis ome naisson *libre* ?

Aquest dira que l'enfant vèn au mounde libre coume l'èr ; l'autre au countràri, qu'adus au soulèu uno vounta encadenado e que soulet, lou sistè-

mo d'educacioun ié pòu douna quauque deliéure.

Parèis qu'an tort tòuti dous. Lou vrai es que l'enfant que nais radicalamen libre, se pòu pas empacha de ressenti l'aflat de soun parentage e de soun teraire, e que toumbo, pièi, dins uno soucieta qu'en ié baiant quàuqui dre, lou cargo tam-bèn de touto uno tiero de devé.

De tòuti aquélis enfluènci qu'agisson sus l'esprit de l'enfant, que dounon uno pendo à soun caratère o marcon d'avanço la direicioun de sa vido, n'en fau teni comte dins l'Educacioun.

E ia *Fraternita* :

Lepelletier la voulié ansin establi :

Aucun domestique ne sera employé dans les maisons d'institution ; les enfants plus âgés donneront aux plus jeunes les secours dont ils pourront avoir besoin. Ils feront, chacun à leur tour, le service commun : ils apprendront tout à la fois à se suffire à eux-mêmes et à se rendre utiles aux autres.

Sènso cerca d'alòngui, diren, quatecant, que tout acò bèu èro pas fa pèr desvouloupa li qualita naturalo de l'enfant, mai pèr lou faire intra dins lou mole unen fabreja pèr lou Gouvèr.

E lou prougramo d'ensignamen establi noun pas sus ço que i'avié dins la naturo, mai sus ço

que voulien que i'aguèsse dins la Republico es
coume un oustau qu'aurié ges de fundamento é
que tendrié, tout-bèu-just, pèr artifice.

SEGOUNDO PARTIDO

La Pedagogio Regionnalisto

CHAPITRE I.

SI PRINCIPE.

Lou principe majourau de l'educacioun regionnalisto es de faire èspandi, dins tout ço qu'a de bon, la naturo de cadun.

Es rèn de prouclama la règlo, la fau, pièi, metre en pratico. Justamen s'atrobo que lou biais, lou caratère, li dispousicioun naturalo soun tala-
men diferènt d'un ome à l'autre, que n'ïa pèr se demanda se faudrié pa 'stabli alor autant de sis-
tèmo d'educacioun que ço que ïa d'enfant.

La naturo respond que, coume a jamai juja bon que l'ome visquèsse soulet, l'a plaça, d'esperelo,

dins la famiho, qu'es uno unita mai counsequènto, la vertadiero unita soucialo e pedagougico.

Dins la famiho, se parlo uno lengo unenco, que sara la proumièro foundamento de l'estrucioun.

Dins la famiho, i'a de coustumo, de fèsto, de cansoun, de tradicioun, que faran lou proumié teissun dóu prougramo.

Li proumiéri leiçoun, li proumiéri paraulo que s'escrincellon tant eisa e tant founs dins l'amo de l'enfant, es au paire e à la maire que counvèn de lis aprendre à si pichot.

L'enfant apartèn à si parènt, à si rèire, à soun oustau, avans d'èstre à la Republico.

L'istitutour estènt que lou segoundàri dóu paire e de la maire, soun proumié devé sara de faire ama l'oustau e grandi dins l'amo de l'enfant li vertu que n'en saran la joio e l'ounour.

Es ansin que lis Anglo-Seissoun an coumprès l'educacioun.

Li famiho, quouro se recampon dins d'endré que la naturo semblo avé alesti pèr acò, formon, tourna-mai, d'unita pu generalo que ié dison : li país.

Lou vilage, emé sis oustau tant gai, sa vesinànço riserello, si long camin ounte se marcho au

fres de l'oumbro entre li riéu e li grands aubre, si jardin e si vergié, si vèrdi pradarié e si lârge plano souleiouso, vaqui lou païs pèr li gènt terrassan.

Li mountagno emé si ro sôuvartous, si mêle gigant, si gaudre, soun sôuvajun, sa nèu, si vâsti fourèst, si carriero de maubre o de pèiro, si bouscatiero e si carbouniero, vaqui lou païs di pastre, di bouscatié, di carbounié e di cassaïre.

La mar, emé sis erso bluio o verdo, si pèis, si couquihage, si costo arèbro, encimelado de pin, vaqui lou païs pèr l'enfant dôu ribeirés que nais pescaïre e que mor marin.

Se fau teni comte, dins l'educacioun, de la famiho e de la raço, se dêu pas ôublida lou mole terrenau ounte la soucieta vèn prendre sa formo : la regioun naturalo o istourico.

Tout ço qu'atrivo lou cor de l'ome, tout ço que ié pren lis iue, l'esperit, la voulounta e la vido, tout aquéu pivelage misterious que l'enracino tóuti li-jour pu founs, ié douno uno educacioun naturalo que res ié pòu escapa e que dêu èstre lou moudèle de l'Educacioun Regiounalisto.

Se i'a, dins un grand païs coume la Franço, de prouvinço tant diferènto que la Picardio, la Lourreno, li païs Basque, la Bretagno e la Prouvènço,

pèr que s'amadure la resoun de l'enfant e que fruche sa voulounta, parai, que dèu èstre necite, coume se farié pèr touto meno de planto, d'emplega pèr chascun un biais diferènt. Sarié contro naturo de se servi pèr tóuti d'un soulet sistèmo d'educacioun.

Dins nosto Prouvènço bello, païs d'armounio e de soulèu, ounte l'amo sèmpre barbèlo d'uno set d'ideau jamai desarsinado, sara pulèu mestié d'abèura l'enfant i sourgènt de l'Art, que dins tout autre endré ounte ié sarien toustèms reguergue.

Emé la raço e lou païs, fau regarda l'epoco.

De noste tèms, sèmblo que la centralisacioun, en trepassant la raro, a fa naisse l'envejo de re-viscoula li pichòti patrio.

Lou vanc d'emigracioun què tiro li gènt di bastido vers li vilo, a fa senti la necessita de refourti l'amour d'ou s'ou nadau au cor di pèd-terrous.

La cativarié de l'ome qu'a perdu touto counceigudo de patrio a fa lusi au grand jour de Diéu lou devé de reviéuda lou goust di causo de l'oustau, de remetre en ounour la lengo atrivarello dis àvi.

Se coumenço de dire, aro, que nous faudrié trouba un terme mejan entre la metodo d'edu-

cacioun que farié, coume dison, que « d'individualisto », em' aquelo, trop generalo, que rabaio dins lou meme gângui tóuti li gènt d'uno nacioun.

Lou sistèmo Regionalisto, sèmblo, se tèn bèn dins aquel entre-mitan, e toucarié belèu la barro.

Touto sa dóutrino poudrié se metre dins tres coumandamen :

I. — Counsidera d'abord ço que l'enfant a dins lou sang e se servi pèr sa proumiero educacioun de ço que counéis adeja quand arribo à l'escolo.

II. — Aparia li metodo i dispousicioun de cado raço, i necessita de cade tèms, à la naturo de cade païs.

III. — Aprepara l'enfant i travai especiau de soun endré, à la vido que sara en raport emé sa coundi-cioun.

Ansin entendudo, la metodo que disèn fai sa part en tóuti : à l'individu, à la famiho, à la raço, à l'endré, em'au tèms.

Soun avantage majourau es que, sènso rên bourroula, fai evouluna touto causo segound sa lèi naturalo.

CHAPITRE II.

SIS APLICACIOUN PRATICO.

Dou principe generau que dis de segui la naturo e d'ana dou couneigu à l'incouneigu, dou particulié au generau, de la famiho à l'endré, anan vèire lis aplicacioun que se n'en pòu faire.

La principalo, alestido pèr lou fraire Savinian (Jòusè Lhermite), es aquelo que se sèr dou parla de l'oustau pèr faire aprendre lou francês.

ARTICLE I.

APLICACIOUN A LA LENGÒ. — LA METODO SAVINIANO.

I. *Pèr aprendre à legi.*

S'es remarca que l'enfant a 'no maniero de parla que ié vèn de sa raço. Quand vòu charra dins uno lengo fourestiero ié porto soun biais particulié.

D'aquí vèn que lou brave escoulan estròpio tant gaiardamen lou francês que lou mèstre s'espeitino pèr i'aprendre à lou bèn parla.

Acò vesènt, lis istitutour, an rèntrouba de mies que de faire la guerro i dialèite loucau.

Savinian, éu, ié dis : « Liogo de lis escarni, servès-vous n'en. » Vaqui ço que fai lou merite e lou nouvèu de sa trobo.

En regard d'ou mot francès que l'escoulan dis pas bèn, fai metre lou mot prouvençau que ié respond. En li counfrountant, l'enfant n'en vèi la difèrènci e arribo à li bèn articula, cadun emé lou bon biais.

Se saup, pèr eisèmples, qu'en prouvençau li finalo di mot soun jamai muto en plen.

En plaço de *l'e mut* francès, i'atroubas :

Quouro un *e*, coume dins lèbre, faire, rouge...

Quouro un *i*, coume dins armari, arabi, Alèssi...

Quouro un *o*, coume dins porto, rosò, amon, volon...

S'escouto que li resson de sa lengo meiralo, l'enfant marcara trop fort la finalo que d'eu resta muto en francès.

La souleto maniero de redreissa aquèu marrit biais es de ié faire establi souvènt de coumparesoun entre la prounounciacion d'ou francès e'quelo d'ou dialèite que l'enfant parlo.

L'h de « héros », « hallebarde », « hérisson » qu'en francès fai durbi la bouco, eisisto pas en lengo d'o, ço que fai que lou pichot Prouvençau parlant francès dira « l'héros », « l'hallebarde », « l'hérisson ».

En prouvençau, quouro dos counsono se tuer-ton, sèmpre n'ïa uno que toumbo o que s'apario emé l'autro : òujèt, òusserva, òuteni, setèmbre, etc... L'enfant prounounciara à la prouvençalo aquéli mot.

D'autre cop, au countràri, pèr trop bèn dire, metra de letro de mai ounte noun es nècite e dira : vonge, vun, voui, etc...

Lou francès a de voucalo que fau dire dóu nas.

Lou prouvençau n'a ges.

Bèn mai, tóuti li letro se ié dison desseparado :

Uno di richesso d'aquelo lengo es que dins li silabo ounte i'a dos o tres voucalo, tóuti se fan senti à despart dins la prounounciacion. En francès, soun talamen foundudo ensèn que n'en fan qu'uno.

Dins tóuti aquéli cas, lou soulet mejan de faire de bon francès e de bon prouvençau es d'establi, coume avèn di, de coumpareçoun e d'òupousiacion.

D'aquéu biais, d'uno pèiro se fai dous cop ; se derrabo rèn, tout devèn armounious, e li dous parla prenon cadun soun racinage tant dins l'esprit que dins lou cor.

II. *Pèr counèisse l'ourtougrâfi.*

En francés l'ourtougrâfi es coumplicado. I'a de mot que s'escrivon diferentamen e que se dison pamens la memo causo :

Saint, sain, sein, seing, ceint, cinq.

Acò 's bon pèr faire toumba lis escoulan de moure-bourdoun en tóuti li pas.

Li metodo óuficialo an que dous mejan pèr aprendre à faire la diferènci : lis esplicacioun etimoulougico, qu'acò 's pas de viéure pèr li pichot vilajan que sabon pas lou latin, o l'afastigouso ditado.

Parlen pas di manjo-campano, que, pèr plus entèndre charra de lèi e de règlo, troubarien rên de mies que de prouclama l'anarchio ourtougrafico !

Emé la metodo de Savinian, rên que pèr lou biais de la coumparesoun, se saup, d'un cop, l'ourtougrâfi de mai de dès milo mot francés.

Ansin, pèr lis eisèmples qu'avèn douna :

Saint	se	dis	en	prouvençau ;	<i>sant, santo</i>
Sain	»	»	»		<i>san, sano</i>
Sein	»	»	»		<i>sen</i>
Seing	»	»	»		<i>sagèu</i>
Ccint	»	»	»		<i>cen, cencho</i>
Cinq	»	»	»		<i>cinq</i>

Pèr destingui *liberté*, *santé*, *charité*, de *année*, *arrivée*, *gelée*, i'a que de pensa li mot en prouvençau : *liberta*, *santa*, *carita* ; *annado*, *arribado*, *jalado*.

Voulès faire la diferènci entre *écriteaux*, *tableaux*, *manteaux* e *chevaux*, *canaux*, *égaux*, avès que de proununcia li mot en prouvençau ; *escritèu*, *tablèu*, *mantèu*, e *chivau*, *canau*, *egau*.

Pèr aquèu signe que ié dison « l'accent circonflexe », que de tèms se perd ! Rèn que de vèire lou mot en prouvençau se coumpren quouro es necite.

Castèu Château.

Aposto Apòtre.

Tèsto Tête.

Fèsto Fête.

Pèr li mot que sonon parié, aquelo metodo pòu rendre de grand service :

Il avait tout ce qu'ils avaient.

Aviè tout ço qu'avien.

Jean sait ses leçons.

Jan saup si leiçoun.

Ce que veut ce cheval ? Se coucher.

Ço que vòu aquèu chivau ? Se coucha.

A Marsiho, que n'en voulïen faire la capitalo de l'Empèri d'ou Soulèu, s'es-ti pas vist, en bèlli letro d'argènt, sus la plaqueto bluio que porto lou noum di carriero :

Rue *Pierre qui rage*, pèr *pèiro que rajo*.

Rue *Jean de Loly*, pèr *Jan de l'oli*.

E sus la carto d'Estat-Majour:

Le *Valcarès*, pèr lou *Vacarès*

Quartier de la *Lèpre*, pèr la *lèbre*.

Etang de *Monro*, pèr Estang di *Mouro*.

Pas-des-Lanciers pèr *Pas-de-l'Enciè* !

Se s'èro pensa à-n-aquelo metodo tant simplò, lou darriè dis escoulan de vilage aurié poussu engarda nòsti saberu franchimand de fauta d'uno talo maniero, que, diguen-lou, ié fai gaire d'ounour !

III. *Pèr reteni li mot.*

Quouro l'enfant arribo à l'escolo, es censa que dèu rên saupre, dïson li prougramo. Lou mèstre, tenènt comte que de la lengo ouficialo, agis vis-à-vis de soun nouvèl escoulan coume s'aquest avié jamai parla d'autro lengo.

Coume se vai engenia lou magistre pèr l'aprendre, à la lèsto, tant de mot fourestié ?

Lou pus eisa sarié de faire coume la maire que permemo soun nistoun au mitan de tóuti li causo de la vido vidanto e que n'ï'en dis lou noum à mesuro que l'enfant li regardo : lou biòu, lou chivau, lou chin, lou cat, la galino, la cabro, etc...

Acò, se vèi d'un cop d'ïue, demandarié uno bello paciènci, em'uno vido longo coume aquelo de Matiéu-Salèn !

Pèr enseguí, tant bèn que se pòu, aquéu biaís tant naturau, an imagina ço qu'apelon « *la leçon de choses* ».

Menon lis escoulan davans de vitrino ounte soun enfermado de couleicioun de causo morto : d'aucèu, de pèis, d'animau empaia, de mounumen en miniaturo, d'òutis de travai, etc., etc...

Mai, pèr avé, coume se dis, tóutis lis erbo-de-sant-Jan, faudrié d'escolo grando coume de museon, e mai encaro !

Emé d'ïmage, dirés, se pòu douna, dins forço mens de plaço, lou retrá de touto causo.

Sian d'acord, mai remarcas pas que l'ïmage manco de vido e de relèu e que fai pas forto impressioun sus l'imaginacioun de l'enfant ?

Que sarié, se 'n foro d'aquéli mejan, voulïen ensigna entre quatre muraio, coume se passo trop souvènt, li causo que venèn de dire, rèn qu'emé

lou secours d'esplicacioun facho dins uno lengo en plen estrangiero au nouvelàri.

Es que s'encaparié pas pus eisa la miro, se tout aquéu museon de richesso e de souveniéro trouba vivènt dins l'esperit e dins lou cor de l'enfant?

Pèr pau que siegue grandet, quouro arribo à l'escolo, l'enfant, peréu, a déjà fa soun pichot camin dins la vido, a déjà recampa quàu saup quant de mot que, dins sa memòri, fan revouluna tout un mounde.

Se ié demandas, en francés, ço qu'es « une cerise, une pêche », segur qu'aquéli mot ié diran pas gaire. Parlas-ié, pèr contro, dins la lengo de sa maire « de l'agroufioun o d'ou pessègue », veirès lou chanjamen. Rèn que lou brut d'aquéli mot fai veni davans sis iue l'image d'aquéli aubrihoun poulit que, planta darrié soun mas, bèn à la calo d'uno lêio de ciprès, se cuerbon, à la primo, de flour blanco vo rosò, pièi, vèngue l'estiéu, de fru delicious. Pas besoun de l'aprendre coume es fa l'aubre, coume es fa lou fru, dins quete terraire vèn, dins queto sesoun s'amaduro, tout acò lou saup déjà de-founs, sèns esfors inutile; li souveni de la vido l'an rejoun dins sa pichoto memòri e dins soun cor en meme tèms.

Sarié-ti pas, uno metodo ansin, la pu facile pèr lou mèstre e la pu proufichablo pèr l'escoulan?

IV. *Pèr courregi lis idioutisme.*

Cado lengo a d'expressioun, de maniero de parla que soun talamen siéuno que se podon pas dire parié dins uno autro.

L'engèni-particulié de nosto lengo d'o fai que li Miejournal que volon franchimandeja, meme aquéli qu'an fa si classo, bouton dins soun parla d'expressioun especialo forço gènto dins soun idioma mai viciouso dins l'autre. Se n'en voulès d'eisèmples avès que de lègi lou « Sermoun de Moussu Sistre » o lou « Lutrín de Ladèr ».

I'a de noum que soun d'un gènre diferènt en francès e en prouvençau : lou pichot escoulan manco pas de li trevira : *Cet huile est très bon ; — elles sont douces ces jujubes ; — j'en ai une besoin ! — c'est de la poison.*

Quant de cop picó à cousta dóu mot qu'es vrai?

Faire les annonces, — se croire, — capiter un bon rencontre.

A l'article se ié fai souvènt passa l'armo à gauchó :
Donne-moi d'eau.

Je veux de pain.

Je vais faire feu.

Coume l'ajeitiéu poussessiéu a ges de plurau en prouvençau se mes ansin en francés :

Ils viennent de *sa* campagne.

Ils ont pris *ses* livres.

A tous, je *lui* ai dit.

Estènt que lou verbe se passo dóu prounoum-sujèt, se fai pas de frès pèr n'i'en croumpa un :

A dit, monsieur... a voulu, en a, viendra...

Quàuqui fes, pamens, se n'i' en met d'inutile o de fautiéu :

Donne-moi-*n'en*... parles-y... dis-y.

Lou verbe èstre qu'a pas besoun d'ajudo, fai : *Siéu* esta ; pèr pas ana cerca pu luen, se dis : Je *suis* été.

Que de causo espetaclouso s'ausisson aïsin :

Il *a* sorti,... il *a* parti,... je *le* pardonne.

Il *s'est* tombé,... je vais *me* changer,... nous *se* battons,... nous *se* reverrons.

Combien *c'est* d'heure ?... Il est sept heures *d'horloge* ! etc., etc.

Dirès que pèr courregi aquéli fauto i'a que de parla segound la lougico. Mai, justamen, lou francés es pas toujours dóu caire de la resoun.

Ansin : *siéu* esta, es-ti pas pu naturau que : *j'ai* été ?

v. *Pèr aqueri l'estile.*

Quouro l'escoulan sara bèn assabenta de tóuti lis artifice de la gramatico, sara tambèn mestié de i'aprendre encaro coume fau adouba sis idéio e engimbra si fraso pèr parla e escriéure poulidamen.

Dins lis escolo franchimando, ié fan faire, sus aquelo estiganço, de *leituro*, de *ditado*, d'*explicacioun*.

Tóuti aquélis eisercice soun gaire, pèr l'escoulan que li fai sènso goust, qu'un mestié de gagno-petit.

La *narracioun* sarié 'n travai forço mai agradiéu.

Lou proumié malur es que l'enfant saup pas trop que ié metre :

« Ne sachant que faire, je t'écris,
Ne sachant, que dire, je finis !

Lou segound es que i'a rên de pu difficile pèr lou mèstre, que de douna de noto e de plaço en d'aquéli coupio e de n'en faire en classo uno courreicioun que proufite en tóuti ! Segur, quouro se debano à-n-un clèvo d'explicacioun sus soun obro particuliero, lis autre ié veson que de blu !

Dins lis escolo de latin, se passo quasimen tout lou bèu jour de Diéu à faire ço qu'apellon de *versioun*.

La *versioun*, se fau créire ço que se dis, es pèr

l'escoulan lou travai lou pus eisa, lou mai agradiéu e lou pu proufichable.

Quouro fai uno narracioun, l'enfant que pòu dire tout ço que ié passo dins l'idèio saup gaire òunte vai faire tèsto.

La versioun, elo, ié marco la draio, es un mou-dèle bèn arresta, que l'elève pòu revira à sa maniero sènso lou coupia à la vitro, e que lou mèstre se n'en pòu servi de normo pèr pratica la courreicioun generalo.

Souvènti-fes, rèn que pèr cerca li mot que respondon bèn just en quauqu' espressioun, fau que l'enfant s'en vague furna dins tóuti li recantoun de soun voucabulàri. I'a rèn que l'aprengue mies à mestreja sa lengo.

Cachas l'amelo, aurés lou meseioun : souto la rusco di mot tambèn troubarés d'idèio. Lou que legis, coume l'amatour pressa que vistaio un museon, fai que passa 'n courrènt davans li fuiet de soun libre ; mai lou que fai uno versioun, coume l'artista que retipo un tablèu, s'aplanto pèr aprefoundi. De tóuti li mot, de tóuti lis espressioun, de tóuti li pensado, n'esprenis la pus escrèto mesoulo pèr se l'assimila avans de la tremuda. D'aquéu biais se fai dins sa memòri em' un magasin de mot, tout un tresor d'idèio.

Sènso parla de tout acò, la versioun a 'ncaro l'avantage de durbi la porto d'un pau tóuti li sciènci. Quau saup tout ço que fau pas pèr esplica coume se dèu quáuqui rego de latin: Gramatico, literaturo, istòri, geougrafio, tout ié vèn.

Un mot sufis pèr engrana lou moulin.

Es-ti pas l'abitudò de la versioun que douno tant de superiourita à-n-aquéu qu'a fa si classo de latin?

Rèn qu'à l'entèndre parla, se vèi lèu à sa favello ufanouso e requisto que trepasso de forço aquéu qu'a fa que soun francès.

Es-ti lou latin que semound aquel avantage?

Nàni, es la coumparesoun.

Bèn mai, lou latin a contro éu d'èstre uno lengo morto que l'enfant counèis pas e que ié fau aprendre 'emé forço lagno.

Quant n'ï'a que, cinq o sièis an de sa vido, se ï'achinisson dessus. pèr arriba, en fin de comte, à lou pas saupre proun bèn pèr n'en tira proufié?

Lou prouvençau, au countràri, qu'es uno lengo vivo, que se païlo, se pòu dire, de neissénço, de quant sarié pus eisido pèr óuteni sèns peno e sèns relàmbi, de resultat, belèu pas tant requist, mai, de tout segur, bèn pus utile.

Uno supousicioun :

Se demandavias à-n-un bon elèvo de latin, meten au proumié de la retourico, de vous dire, rèn qu'à l'ausi, ço que i'a dins uno letro de Pline o uno coumèdi de Plaute que ié legirias, cresès, vous, que n'en sarias lèu assabenta?

E que sarié, alor, s'avias chausi uno odo de Pindare o un idile de Teoucrité?

Dins l'escolo d'ou darrié vilajoun, prenès, au countràri un pichot drole de douge an, que ié legirès un conte de Roumanille, uno pajo di Memòri de Mistral.

Aurès pa 'ncaro acaba vosto leituro, que veirès lou pichot moustrihoun se chala de plesi o s'estrassa d'ou rire.

A pas besoun que ié fagon lume, d'ou proumié cop coumpren tout.

Se lou fasias un pau reflechi, coume poussedis, dins lou founs meme de sa naturo, l'engèni de sa lengo, vous espantarié de veire coume n'en sesis li pus escrèto nuanço.

Se sias prouvençau e bachelié, assajas de faire d'espervous l'esperènci. Segur, n'aura proun pèr faire de vous un... felibre, emai di pur!

Estènt, la lengo meiralo, tant bèn counceigudo

de l'enfant, se pòu faire em' elo, dins li classo, de versioun ouralo, que soun encaro bèn pu vivèto e bèn pus utilo que li versioun escricho.

Long de la vido vidanto, que se passò dins la tèsto d'ou prouvençau que vòu franchimandeja?

Ço que pènso, lou pènso en prouvençau, e quouro lou vòu dire ié vèn sus li bouco rèn que li mot de la lengo di rèire.

Pèr li rèndre en francès, fau que li tremude e, coume acò se deu faire dins un vira d'ïue, a pas lou tèms de mesura soun cop e enguño pas toujours l'anello.

S'aquelo traducioun, qu'es soun pan de tóuti li jour, ié la fasien faire à l'escolo, quete service ié rendrien pas !

ART. II.

APLICACIOUN PU GENERALO.

1. *L'istòri de la lengo e de la literaturo.*

Sarié pas juste de crèire que nosto metodo pòu servi qu'à redreissa l'ourtougràfi, coumpleta la gramatico o esmera l'estile.

La lengo prouvençalo es la branco-maire d'ou latin. Soun passat manco pas de glòri.

A l'Age-Mejan si pouèto, li troubadour, faguèron trelusi soun nòm dins tóuti li païs.

A nòsti lengo mouderno, es elo que i'aprenuguè li mistèri dóu Gai-Sabé, quouro, pecaire! èron encaro dins lou brès.

Souto l'aurige que venguè dóu païs d'aut, la lengo d'o cliné la tèsto mai mouriguè pas.

Coume la souco què despampo, l'ivèr, mai que, souto l'aflat dóu sant souléu de Diéu cargo tourna-mai si fueio, si flour e si rasin, avèn vist nosto lengo vivo regreia, e reflouri despièi qu'a trelusi l'estello de Font-Segugno.

Tout acò bèu lou faudrié dire à nòsti jouïnesso dins de bon pichot libre que se metrien dins tóuti lis escolo.

II. *Lis obro de literaturo.*

Es pas tout que lis enfant sachon legi.

Quouro l'escolo i'aura douna lou goust de la leituro, li faudra prouvesi de libre que li diverti-gon sènso ié faire de mau.

L'oubrié, lou païsan, de-que legis, aro?

Trop souvènt, ai las! fau bèn avé lou triste courage de lou dire, se nourris gaire que dóu rambuei d'aquéli marrit fueitoun que fan bèn de s'escoundre au debas di journau, o d'aquéli publicacioun que se vèndon dous sòu e que, bessai, valon pa 'n piéd.

Coume vai que legis pas li bèllis obro franceso que n'ï an dich en classo e la valour e l'agradanço?

Es que, belèu, ié passon trop dessus la tèsto e, que venènt pas de sourso poulàri, soun pas pèr ié couveni.

A l'enfant emai, tambèn, à l'ome de Prouvènço se dounavias pèr legi, lis obro sano e goustouso de nòsti bon felibre, veirias se ié troubarien pas soun viéure.

« Ah! disié 'n jour lou Mèstre à prepaus di recuei de Savinian, se quand erian jouine nous avien baia de libre ansin, nous ié sarian jita dessus coume li dindoun sus lis amour! »

Aquelo literaturo prouvençalo que respond tant bèn is aspiracioun d'ou pople, que, pleno de soulèu e de mistrau, tirasso jamai de fango, ié dounarié lou goust di leituro bello e bono e lou menarié, de fiéu en courduro, enjusqu'is obro requisto qu'es tant daumage que ié rèste, aro, estrangié.

III. *L'istòri loucalo.*

Se se fasié faire li versioun coume avèn di, rèn qu'à prepaus d'un mot que se rescountrarié d'asard, quau saup quant d'esplicacioun poudrié douna lou mèstre sus l'istòri nostro.

« Travaia coume un Cesar »

ié baiarié l'oucasioun de parla d'aquéu grand coun-
quistaire que tenié tèsto en tant de gènt e d'esplica
ço que faguè emé nòsti rèire.

« Parla coume la bello Jano »

que revenjè tambèn soun ounour davans la court
pountificalo, farié avena touto l'istòri de la famiho
napoulitano emai di Papo d'Avignoun.

« Faire sa Cassandro »

vous bandirié au bèu mitan di palais de Priam
qu'aquelo pauro chato n'en fasié que crida li
malur.

« A l'asard,
Bautezar ! »

crid de guerro de la famiho di Baus, que se disien
felen d'aquéu rèi mage, rementarié la legèndo de
l'Estello que menè, fau créire, li rèi Maure enjus-
quo sus li colo di Baus.

Li regiounalisto trobon que d'esplicacioun ansin,
semenado un pau clar dins la vido dis escoulan, ié
podon pas sufi, e volon que se fague, à l'escolo,
de leiçoun coumplèto sus l'istòri de cade endré.

S'es vrai que l'ome pren tant-mai d'interès i
causo que tant-mai aquéli causo lou tocon, segur
qu'ausira 'mé forço atencioun e forço plesi ço

que ié sara di de si rèire que n'a lou sang dins si veno e que n'en gardo encaro l'oustau.

Quouro se parlo di Sarrasin, pèr eisèmple, avès acoustuma que li pichot vous digon coume un refrin de papagai : « Ils furent écrasés à la bataille de Poitiers. »

E que ié pòu faire is enfant d'Avignoun ço que s'es passa tant luen de soun païs ?

Sèns ana bousca fin qu'à Peitiéu, pèr ié douna l'idèio frapanto de ço que fuguè, dins l'espaventamen e la terrour di pople, aquelo invasioun barbaresco, avias que de ié dire: « Venguèron, aqui-toucant, li negre Sarrasin, sus li ribo d'en Durènço, à dos lègo d'Avignoun. Tòuti li ciéutadan que i'èron ana barra la routo fuguèron chapla e la vilo presso e sagatado. Uno carriero que gardo encaro lou noum de « Rue Rouge » rapello l'orre tuo-gènt que ié faguèron li Maure tourmento-crestian. »

Quand lis Avignounen se soun vougu paga lou lüssi d'un mounumen, en plaço de quiha, sus lou releisset d'uno grand coulouno, sis edile afrejouli, sènso ié douna lou mejan de metre li man dins si pòchi, s'avien sachu soun istòri, de quant aurien mies ama representa, fieramen enmantela dins si togo, si conse auturous que, sièis mes à-de-rèng,

tenguéron en respèt quatre-vint-milo ome dóu rèi de Franço?

Cade païs a d'ufanous souveni.

Marsiho apello « Balouard di Damo » l'endré ounte si dono valentouso ajudéron tant poulidamen li sódard de la ciéuta à désbousca lou traite Bourbon que n'en fasié lou sèti.

Fourcauquié se fai tambèn vanita de la bèuta di quatre fiho de soun comte Ramoun-Berenguié IV, que venguéron tóuti réino courounado.

Ais fuguè la proumiero coulounio di Rouman, e Pourriero veguè la grand vitòri de Marius sus li Téutoun.

Tout à l'entour de Toulouso, s'aubouré lou Miejour, luchant pèr soun independènci.

Pau se rapelo toujours qu'avans d'èstre rèi de Franço, « lou nouste Enric » èro l'enfant dóu Biarn.

Pertout i'a de pousso de glòri. Pertout de vièi pèiro, pertout de vièi drapèu, pertout de vièi blason dison la valentié e canton li prouëssos de nòsti rèire.

Es em' aquéli souveni que fau acaloura lou cor de si felen.

L'au pas que se digue rên que la vido di grand capitâni qu'an fa tua tant de gënt, mai tambén aquelo dis ome tranquile qu'an gari li plago de la guerro e rendu la pas à l'umanita.

Quouro l'Empeaire pèr mestreja l'Europo avié besoun de tira de França tant de sôdard que se poudié, se coumpren que faguèsse douna 'n touto la nacioun un ensignamen militàri.

Mai aro que se sènt plus que la necessita de vièure d'amistanço e de fraternita, ço que fau pourgi à la jouinesso es pulèu l'eisèmples dis ome de bèn, di travaiaire de touto merço qu'an fa la grandour e lou bonur de noste país.

Quau a di que la legèndo èro pu vertadiero que l'istòri?

N'en manco pas, la Prouvènço, de tradicioun e de legèndo !

L'a dous milo cinq cènts an, li Grè de Foucéio abourdavon au Lacidoun e foundavon Massalio.

Èro lou jour, se dis, que la fiho dóu rèi di Ligour se devié, tout-bèu-just, chausi soun mari-daire en ié venènt pourgi sa coupo.

Davans tóuti li jouvènt de soun país, candi e esbalausi, Gitis passo coume uno fado e, pive-lado, s'envai tout dre vers Protis, l'ardit navigaire.

Dins un tant poulit raconte, la critico despi-chouso voudra vèire, belèu, qu'un fantasious pantaiaje de pouèto.

E pamens que i'a de pu vrai? Es-ti pas lou biais lou pu galant de nous aprendre que, counquistado pèr la gràci d'aquéli ome bèu coume de diéu, la Prouvènço se donè, amourouso e sourrisènto, à la civilisacioun nouvello que i'adusien d'Elenio, enterin que dins li founsarùdi fourèst de Gaulo cremavo pertout l'orre fiò di sacrifice uman?

Quàuqui siècle pu tard, sus uno ratamalo embandido de Judèio, sènso velo e sènso remo, fuguèron mena, pèr la man de Diéu, enjusqu'i ribo sablouso de la Camargo nostro, li sorre emé li fraire dóu

...« Bèu fustié de Galilèio,
Lou fustié di péu blound, qu'amansissié li cor
Emé lou mèu di parabolo,
E qu'à bèl èime, sus li colo,
Li nourrissié 'mé de caudolo.
E toucavo si ladre, e revenié si mort ! »

(MIRÈIO, Cant XI.)

Coumpagnoun de soun eisistènci, testimòni de si miracle, aquéli que

L'avien vist blanqueja dins sa raubo de lin,

pèr ié pourta lou lum de la grand Paraulo se partèjon lou païs :

D'Ais Meissemin fuguè l'apouesto ;
Trefume ravièudè lou vièi Arle rouman ;
Martò fuguè Tarascounenco ;
Ruf Avignounen ; auturenco,
Dins uno baumo peirounenco,
Madaleno empurè soun amourubre-uman.

(ESTELLO, Cant VII.)

Quau poudrié faire eici la part de la légèndo e quello de l'istòri ?

Çò que i'a de bon à reteni es que, bello proumierenco, la Prouvènço a reçaupu lou tresor de la civilisacioun e de la fe, tresor que se deurié garda coume un Sant-Grasau dins lou cor de nòsti pople.

Es-ti pas vrai, qu'ansin entendudo, l'istòri devendrié un liame, poudèrous autant qu'agradieu, qu'estacarié lis ome au terraire e ié caviaharié au cor lou vertadier amour de la patrio siéuno ?

IV. *La Geougrafio.*

La lengo prouvençalo que vous pinto li causo e que vous li fai vèire coume dins un mirau, douno i diferents endrè de noum que n'en retrason la coulour, la naturo, la situacioun.

Quouro lou vouiajour veira sus sa carto de noum coume : l'Aubaredo, l'Ameleiredo, lis Avellan, lis Amarino, l'Arenas, lou Sistre, lou Lauroun, etc. saupra qu'aquí i'a d'aubo, d'amelié, de sause, de sablo, d'aigo.

Quand l'erbouristo es en bousco de planto que vènon au cagnard, s'es bon prouvençau, segur s'anara pas engana dins *lis Uba*, cercara que *lis Adré*.

De la geougrafio, que poudrié èstre un estúdi di pus agradiéu, se n'en fai malurousamen qu'uno arro noumenclaturo de noum de vilo, de ribiero o de mountagno.

Noun pas dire à l'enfant, emé tant de detai, coume es facho l'Americo, que n' i' aura pas un beléu que i'anara jamai, perqué pas ié parla d'abord dóu país ounte es nascu, de l'encountrado ounte faudra que passe touto sa vido?

Au pichot Prouvençau sarié-ti pas forço mai à prepaus d'esplica coume vai que la Durénço a de desbord tant soude qu'estounon pèr lou mau que fan e que ié dison de « durençado », perqué lou Rose mounto pu vivamen quouro l'oundau vèn de l'Ardècho que quouro vèn de la Sono, coume se fai que lou mistrau ié dison lou « manjo-fango », etc., etc.?

Quet es l'escoulan qu'a pa 'ntendu parla de la Crau, aquèu desert prouvençau que ié vèn rên que de caïau? Après i'avé di la resoun que l'a facho ansin apela, que noun se ié fai pas lou raconte di legêndo qu'a coungreïado dins l'imaginacioun di pouêto, despièi la pu viêio antiqueta?

Ensignado d'aquèu biais, la geougrafio vendrié tant-lèu un estûdi bèn vivênt e proufichable que noun-sai.

Quand se sarié fa counêisse ansin à l'enfant tout ço qu'es à soun entour, coume es de bello à vèire que rên sarié pus eïsa que d'estêndre pau à cha pau li desçricioun, de la coumuno à la prouvinço, à la nacioun, au mounde.

En ié dounant l'abitudò de se rêndre comte de tout ço qu'a souto lis iue, ié fasès veni l'envejo d'estudia, de-founs, la naturo de tout ço que saup pas.

En plaço de n'en faire un papagai o, bèn pire, un indifèrênt, que se çrêis de tout saupre amor qu'a retengu quàuqui renguiero de mot, fasès un esperit desirous de tout aprefoundi, ço qu'es, à noste avejaire, lou pu bèu trioumfe de l'educacioun.

IV. *Li Sciènci de la naturo.*

Coume l'avèn òusserva en parlant de la geou-grafio, poudèn redire eici que, souvènti fes, lou noum prouvençau di planto, di bèsti, dis aucèu, sèr à n'en douna lou retra.

Pèr n'en saupre, au mens la qualita la pu frapanto, i'a que de nouma :

Permié lis aucèu : lou verdoun, lou guigno-co, lou sarraïé, lou chi, lou quiéu-blanc, etc.

Entre li pèis : la rascasso, la galineto, lou loup, l'estranglo-bello-maire, lou sautaire, la daurado, l'estello, lou pèis-d'argènt, l'aguïo, lou rouget, etc.

Dins li planto : l'arrapo-péu, la co-de-gârri, lou sauno-gârri, lou trauco-sa, l'amarun, lou fouito-bon-Diéu, lou penitènt blu, etc.

T'outi aquéli noum que designon proun claramen la naturo de l'animau o de la planto, quand se rescontron emé la formo que s'emplego dins la vido vidanto, eigrejon, coume avèn di, tout plen d'image e de souveni, bèn mies que touto la sequelo di noum latin, qu'es tant de malo à reteni e que parlon pas à nosto amo.

Rèn qu'en fasènt counèisse à l'enfant de Prouvènço l'istòri e li prouprieta di planto que n'en

saup deja lou noum quand vèn à l'escolo, saubrié quasimen touto la boutanico de l'Europo.

« La Franço, a di Mistral, es forço richo en planto de touto sorto. (Se n'i'en comto segur pròchi de 7.000 espèci.) Mai lou caire de la Franço emai belèu d'Europo, lou pu riche en erbouriho es noste vau de Rose. L'ome, efetivamen, qu'en partènt d'Arle, ribejarié la mar enjusqu'à Iero e pièi s'enmountarié jusqu'à la cimo dis Aup, rescountrarié long d'ou camin, à diversis auturo, qu'asi tout l'erbouran de Franço emai d'Europo, desempièi l'arangié de Pourtugau, jusqu'i sap e i mèle em' i bes de la Nourvejo, jusqu'i jauneto de l'Islando. »

Dins li Memòri d'ou Mèstre que vènon tout-bèu-just de parèisse, avès pas legi aquèu delicious raconte que s'apello « Lou Plantié » ?

« Tout lou jour n'es qu'un jo, t'outi li saut de cabriolo... E qu'es besoun de cambarado ? T'outi li bèsti e bestiolo, aqui, lis avès pèr coumpagno. Coumprenès ço que fan, ço que dison, ço que pènsou, e sèmblo que coumprenon tout ço que ié disès.

« Agantas uno cigalo ? ié regardas si miraiet, la frisas dins la man pèr la faire canta.

« O bèn, coucha long d'uno ribo, i'aura 'no pou-

lo-de-sant-Jan que vous escalo sus lou det? Lèu ié cantas eiçò :

Parpaiolo, volo!
Vai-t-en à l'escolo!
Prene ti matino,
Vai à la dóutrino...

« Em'acò la pouleto, desplegant sis alo:

— Vai-ié-tu, à l'escolo, que iéu n'en sabe proun, vous dis en s'envoulant.

« Un prègo-Diéu-d'estoublo, ageinouia, vous arregardo?

— Prègo-Diéu, ié venès, prègo-Diéu, tu que sables tout,

Ounte es lou loup?

« E lou prègo-Diéu, estirant la pauto vous fai signe vers la colo.

« Un lesert? Destouscas un lesert que se souleio?

Lesert, ié venès, lesert,
Aparo-me di serp:
Quand passaras vers moun oustau,
Te baiarai un gran de sau.

— A toun oustau? que noun iéournes! lou fin limbert a l'èr de dire, e zòu! s'enfuso dins soun trau. »

En anant au champ, l'ome que sauprié ansin lis abitudo de tóuti li bèsti, lou biais de tóuti li

planto, se sentirié tout lou jour en coumpagno e coumuniarié vertadieramen emé l'amo de soun pais.

v. *L'Art regiounau.*

Uno partido de l'educacioun qu'a bèn soun impourtanço, es la preparacioun artistico de la jouinesso.

L'obro sara gaire dificilo emé l'enfant de la Prouvènço, qu'a, de neïssènço, lou goust d'ou bieu.

M'es avis que, dins noste país, faudrié imita lis ancian Grè que, pèr empura l'amour de l'Art, se metien de-longo souto lis iue de bèlli formo.

Noun es besoun d'espandi de gràndi teourio, mai de faire amira is enfant ço que lis enviroüno.

Quet es lou país qu'a pas, au mens, un moumen, uno bello estatuo, un tablèu precious? Lou darrié vilajoun de nosto terro benesido a toujour qu'auqui bèus endré que soun à la pourtado de tóuti li mèstre e de tóuti lis escoulan.

Uno causo que s'atrobo dins cade oustau e que pòu servi forço eisa à fourma lou goust di pu pichot enfant, es lou moubilié.

Es dins lou moble, bessai, que se marco lou

mies l'estile de cado epoco. Es, éu, beléu, lou mirau lou pu vertadié de l'art de cado raço.

Ço que fai lou merite di mobile requist que se veson encaro en terro d'Arle, es que lis artistico que lis an fa, an pas cerca à-n-espousca soun mounde, en lis aclapant de touto meno de farfantello, coume se fagué, en Franço, d'ou téms de Louis XV.

Tout ço que i'escrincellon dessus es tira d'ou païs, n'en retrais poulidamen li bèsti, lis aubre, li planto, li flour, li estrumen de musico o de travai, e, causo à remarca, s'èmpre lou sujet es en raport emé lou service que d'eu rampli lou mobile.

Ansin, sus lou pestrin, es figurado la soupiero, ournemen de t'outi li repas de famiho.

Sus la mastro, i'a d'espigo, de garbo, de cigalo.

Sus l'armari, i'a lou tambourin, beléu p'èr ié faire dansa davans, se 'n-cop i'a r'èn dins la paniero !

Au frountau d'ou gardo-raubo, se bequejon de tourtourèu, eisèmpre agradiéu p'èr li jouinesso que rintron en meinage.

Sus la fariniero, s'alongo un p'èis que s'èmblo tout l'èst p'èr sauta dins la sartan.

Sus la saliero, s'espandisson li flour de saladello o s'estiron li càrri salinié que van querre la sau à Berro.

Se s'aprenien, à l'escolo, li secret tradiciounau de l'estile prouvençau, quau saup se se poudriè pas reviéuda aquélis ataié tant renouma, ounte se fabricavo lou moble d'Arle, li faiènço de Moustié, de Marsiho e d'Avignoun o li terraio d'Ate?

Emé la simpla estiganço de rèndre si leiçoun pus agradivo, la pichoto escolo d'ou vilage aurié ansin gagna de reviha l'engèni d'uno raço e de coungreia touto uno armado d'artista, capable de semena, dins lis oustau, d'oubreto gènto e gaio, que n'en farien autant de pichot paradis!

VII. *Li jo. — Li fèsto.*

Li jo, que sèmbelon causo futilo, soun tambèn, pèr l'educatour, uno ajudo forço preciouso pèr counserva li tradicioun d'uno raço, e prepara li jouvènt à si travaï de pu tard.

Lis un, coume lou jo di Jardinié, lou jo de l'Eissado, lou jo de la Vigno, èron fa pèr entre-teni l'amour de la terro e la tradicioun di culturo naciounalo.

Lis autre, coume lou jo de la Pico, servavon lou goust de l'art de la guerro.

Emé li jo istouri que rementavon li grands evenimen e recalivavon l'amour de la patrio, coume la Bello-Estello de Pertus, la fèsto d'ou Petardié de Castelano, la Bravado de Sant-Trou-

pés, l'avié 'ncaro li jo legendâri e religious, coume aquéli de la Tarasco à Tarascoun, de la Maio o de la rèino de Mai à Marsiho, de la Fèsto de Diéu à-z-Ais, ounte pareissien li Sants Innoucènt, li Proufêto, li Réi, la Sibilo.

Emé la gaieta di rèire, segardavo, ansin, li tradicioun e l'èime de la raço.

La musico ajudavo à faire briha li fèsto.

Lis èr naciounau, li cansoun tradiciounalo entretenien la bono imour bèn mies que lou podon faire, aro, li tristi resson de Café-councert.

L'Amour, quouro se n'en parlavo dins nòsti cant poupulâri, èro jouine e gai, simple e naturau, e riscavo pas de sembla 'n rên à-n-aquéli caricaturo mau-courouso que tirasson lis orgue de Barbarié de carriero en carriero, de gandolo en gandolo.

Zôu! à l'escolo, fasen canta!

Zôu! à l'escolo, fasen aprendre lou tambourin emai lou galoubet!

Que nòsti drole laisson pas s'esvali li bèlli cansoun di rèire!

Quéti tresor d'armounio aquéli meloudio, ounte sèmblo que cante 'ncaro l'amo de touto la raço, farien-ti pas sourgenta dins lou cor de nòstis enfant?

Es-ti pas emé de cansoun que la maire dóu Pouéto fagué 'spandi l'engèni de noste grand Mistral ?

En Prouvènço s'es toujours canta, dins li moumen de joio e d'estrambord, coume is ouro de lassige, d'amarun, de lagremo ē de desfèci? Pèr lou pople prouvençau, canta es la mita de la vido.

Pèr que lou bouié travaie em' ardidesso, ié fau de cansoun. N'en fau pèr li meissoun, pèr li vendèmi, pèr lis òulivado, pèr tout.

Mirèio cantavo quand èro à la fueio. Noro cantavo i descoucounarello.

De cansoun ? Es pas ço que manco dins nosto bello Prouvènço; lou tout es qu'à l'escolo li sachon garda e faire flouri coume se déu.

Quouro s'es proun canta es de resoun, de fes, de dansa.

Pèr counquista lou Nord, dison que lou Miejour agué besoun que de sa

« ...farandoulo,
La naciounalo danso roudanenco
E dóu reiaume ancian di Bousounido,
Que, de Coundriéu à-n-Arle, i jour de voto,
Di viravòut dóu Rose imitarello,
Ersejo e fai la serp au long di dougo.

(*Mistral*, LOU ROS², cant I, p 8.)

Li Mouresco, lis Ouliveto, li Triho, li Fielouso, representon lis evenimen de l'istòri, li glòri de la patrio o lis obro de la terro.

Coume li danso grèco, soun un regale pèr lis iue, sèns èstre un dangié pèr lis amo.

Se i'a 'no cantounado, dins l'oustau, que siegue, pèr la famiho, lou misterious recate di tradicioun li pus amado, es bèn aquéu ounte, tóuti lis an, se fai, sus uno pichouno tauleto, la Crècho de Nouvè.

La vèio d'aquéu bèn jour, li drole parton, dins li colo, cerca la mousso e lou verd-bouisset. Enterin que lou paire alestis li roucas de papié e lis oustaloun de gip, li chatouno aduson, afeciounado, li poulidi fucio argentalo que gardavon despièi de mes, e que van inserti mignounamen entre lis asclo di roucas, pèr sembla de pichoun riéu que cascaion risoulet.

La maire, emé religioun, sort de l'armari ounte lis avié tant bèn rejoun, li santoun que lou segne paire achetè à Marsiho, pèr la fiero de sant Miquèu e que representon, chascun, quauque persounage de l'endré. Soun tóuti 'qui, l'un emé soun panié d'iòu, l'autre emé soun froumage o sa fougasso, lou mounié emé soun sa de farino sus l'esquino, l'amoulaire que viro sa rodo, lou cassaire que bat

lou trescamp, li rèi Mage que vènon, en longo teourio, seguissènt la Bello-Estello. E, dins la bòri de Betelèn, entre l'ase e lou biòu, soto l'aflat de l'ange boufarèu, coucha su 'n pau de paio, lou pichoun Jèsus que fai cachiero en tòuti.

Lou sant jour de Nouvé, à l'entour de la memo taulo, qu'a benesido lou Segne-grand, tòuti li parènt e tòuti li serviciàu s'atrobon acampa pèr pausa, segound lis us tradiciounau, lou meme cacho-fiò e manja, ensèn, lou meme calendau.

La joio trèvo tòuti lis oustau, canto dins tòuti li cor, luis dins tòuti lis iue :

« Alègre ! alègre !

Que noste Segne nous alègre !

S'un autre an sian pas mai, moun Diéu ! fuguen pas mens ! »

Quéti poulit tablèu pèr eigreja l'engèni creatour di pichots artisto, quéti dous remèmbe pèr aubourra l'amo di travaiadou !

Galant nouvè, canta davans lou bres de l'Enfant-Diéu, bèlli candeletto, abrado sus la taulo calendalo, sias d'armounio, sias d'estello, qu'enlusissès la vido dis enfant de Prouvènço !

Ah ! se l'escolo sabié tira de nòsti tradicioun touto l'ajudo que podon semoundre, queto obro bono que farié !

CHAPITRE III.

LI LIBRE.

Pèr metre en pratico l'ensignamen qu'avèn di, fau de libre: n'en fau qu'assabènton li mèstre, n'en fau que siegon à la poutado dis enfant.

Se n'es fa de bèn poulit.

Entre li pu remarcable e li pu recoumandable, noumaren li dóu fraire Savinian, de Lacoste, de Boudon, dóu fraire Constantin.

Pèr redreissa li « prouvençalisme » que, de-longo, vènon sus li bouco di Miejournal, quand volon parla francés, avèn li libre de Rolland de Gap, de J.-B. Reynier e de C. de Gabrielli.

Pèr li gramatico e li diciounàri, la noumenclaturo n'es facho à-n-aquéli mot dins lou « Tresor dóu Felibrige » de F. Mistral.

D'oubrage saberu sus l'istòri, la geougratio, la filoulougio, n'i'a de touto merço e de forço bèn fa.

Es pas mestié de li nouma eici.

Voulèn tout-just charra 'n brèu d'aquéli que sarié lou mai à prepaus de semoundre is escou-

lan, e tambèn is ome de touto meno, quouro ié pren l'envejo de legi.

Nous revèn que Lamartine, après l'aparicioun de Mirèio, escrivié :

« Si j'étais Ministre de l'Instruction Publique, je ferais imprimer à six millions d'exemplaires le poème épique de Mirèio et je l'envverrais gratuitement à toutes les portes où il y aurait une mère, un vieillard, un fils capable d'épeler ce catéchisme de sentiment, de vertu, de poésie. »

Segur que, pèr lis ome que counèisson la vido e qu'an legi tant soulamen li « Faits Divers » d'ou proumiè journau franchimand, lis obro coumplèto de nòsti bon felibre farien censa l'efèt d'un catechime de vertu e de sentimen !

Mai, pèr bello que siegon, counvendrés que se podon pas metre, talo qualo, entre li man dis enfant. Li jouinis amo soun talamen delicato, que demandon uno reservo jalouso dins la chausido de si legèndo. I'a de pensado emai de sentimen que devon s'amadura que dins soun tèms, pèr pas toumba si flour trop lèu !

Aquélis obro, pamens, que ié dison : Mirèio, Calendau, Nerto, la Rèino Jano, lou Rose, la Miougrano, lis Oubreto, la Bresco, la Farandoulo, la Rampelado, Amour e plour, li Parpaioun blu, las Papilhotos, la Glòri d'Esclar-

moundo, Cants de l'aubo, Cants del soulelh, lou Terradou, Vido d'enfant, Cantos d'azur, Estello, Belino, an d'endré talamen requist que se podon pas leissa de caire.

Savinian e Lacoste i'an fà quàuqui culido que formon li pu delicious librihoun.

Dins l'Aiòli dóu 7 d'abriéu 1894, Mistral escrivié :

« Après avé leva de l'amo di pichot tóuti aquéli tradicioun que ié fasien ama la terro e ié rendien la vido alègro, se vènon d'avisa (trop tard) que lis enfant d'aro, tant bèn nouta que fugon e breveta e diplouma, soun vuege e anouï.

« E alor, au Menistèri de l'Estrucioun Publico, vènon de durbi un counours pèr crea, à l'usage dis escolo primàri, un *Recuei de cant pòupulàri* que se pòsson apprendre is enfant eisadamen.

« Ah! tè, valié la peno de cresta la generacioun, de ié leva, is escoulan, tout ço qu'adusien de l'oustau e que tenien de-vers si maire, pèr recounèisse pièi après, qu'emé tout soun renouvelun de l'ensignamen enfantin s'èro souvènt fa rèn que vaie.

« Mai, basto, sarié rèn, s'aquéli qu'an fauta, recounèissent sa fauto, leissavon la naturo remetre douçamen tóuti li causo en plaço, valènt-à-dire se leissavon o s'ajudavon meme li flour dóu terra-

dou, lis alenado d'ou païs, embeima 'n pau nòstis escolo..»

Pèr faire canta l'enfantuegno, que se poudrié trouba de pu dous, de pu gai que nòsti cant pou-pulàri?

Lou « Cansounié de la Prouvènço » adouba pèr l'Escolo parisenco d'ou Felibrige, li « Cant d'ou Terraire » de Charloun Riéu, li « Chants populaires de la Provence », reculi pèr Damàsi Arbaud, li Nouvè de touto meno countènon de vertadié tresor.

De tout acò se poudrié tira, pèr lis escolo, lou pu galant cansounié, qu'emé « la joio e lou soulas », escampiharié, dins li cor, e l'amour d'ou païs, e lou goust de touti li causo de l'oustau.

La terro de Prouvènço es touto clafido de bèllis espigo daurado, manco qu'uno man pèr li nousa en garbo :

Ah ! se me sabien entendre !

Ah ! se me voulien segui !

CHAPITRE IV.

LI. MÈSTRE.

Li meiour libre, fau de bon mèstre pèr lis esplica.

Di qualita generalo que res se n'en pòu passa, n'en voulèn pas parla : sabèn que pèr resta de-longo au service d'aquelo pichoto marmaio, que , lou fau dire, es pas toujours bèn agradivo, es pas un mestié, mai uno voucacioun que demando forço annegacioun.

Ço que nous enchau de saupre eici, es que lou mèstre, tèn la plaço di parènt. Acò 's lou principe majour que mestrejo touto la questioun.

Se li vòu ramplaça coume se dèu, fau que pèns coume éli, que parle is enfant coume ié parlarié sa maire, que i'ensigne que ço que soun paire voudrié que ié sieguésse après.

Pèr capita tout acò, sèmblo qu'uno coundicioun sufirié : que li mèstre siegon chausi sus plaço, que

siegon d'ou meme païs, e de la memo raço, que parlon la memo lengo que sis escoulan.

Coume voulès qu'enantigue l'enfant dins l'èime de sa raço e lou biais de soun endré, lou fourestié qu'es eisila d'ou siéu.

Un istitutour qu'a fa de béus estúdi à Paris e que toumbo, pecaire ! dins un pichot vilajoun que n'en counéis ni la lengo, ni li mour, ni lis usage, ni li tradicioun, es lou proumier à n'en pati.

Se, coume i'a rên de pu naturau, amo lou païs d'ounte vên, ounte es nascu, e lou trobo lou pu bêu, coume voulès qu'ensigne à la jouinesso l'amour d'un endré que counéis pas o qu'amo gaire ?

S'es un ome de la bono e s'a la voulounta de faire tout soun devé, tambên se pòu que s'atale au pres-fa d'estudia aquelo terro nouvello ounte arribo. Mai poudra-ti jamai la counéisse de founs, dins lou pau de tèms que ié restara ; car, s'es ambicious aura qu'un desir, de n'en parti au pu vite.

Uno di resoun qu'empachéron long-tèms lis istitutour de parla is enfant la lengo de soun endré es la pòu qu'avien de passa pèr de gavot.

Souto l'allat d'inspiracioun e d'eisèmples que par-ton d'aut, la jouino generacioun di mèstre coumpren mies soun devé e fai mostro de se voulé afe-

ciouna i causo di prouvinço, à sa lengo, à soun istòri, à si-mounumen, à tóuti si tradicioun.

« Nos instituteurs, disié M. Bréal en 1872, qui, pour la plupart sont nés à la campagne..., sont bien préparés pour donner l'enseignement régional dont nous venons de parler.

« La seule difficulté, c'est de vaincre la prévention qui existe chez eux, et peut-être plus fortement chez ceux-là qui ont le plus longtemps parlé le patois au foyer domestique; mais un cours d'histoire de la langue, donné à l'Ecole normale, triomphera sans peine de ces préjugés. »

Que se siegue fa à l' « Escolo Nourmalo » lou « cours » demanda, acò lou poudèn pas afourti, mai ço que tóuti podon vèire es qu'à l'ouro de vuei, touto enfusco es toumbado. Liogo de sounja rên qu'à passa pèr de « bèu moussu » que parlon mies que tóuti la lengo de Paris, li mèstre revènon tourna-mai à l'ideau ancian, que fasié dóu magistère, dins cade vilage, l'ami e lou counseié de tóuti, lou depousitàri de la sciènci e lou gardian dis us tradiciounau.

CHAPITRE V.

SI RESULTAT.

Appreciacion generalo.

Aro que sabèn tóuti lis estè de la metodo regiounalisto n'en poudèn assaja uno appreciacion generalo.

Sa proumiero qualita es de segui la resoun e la lougico. En plaço de caro-vira tout ço que i'a de bon dins l'esperit de l'enfant, s'aplico à-n-estudia li semenço coungreïado dins soun inteligènci pèr la vertu de l'eredita, pèr pièi li faire 'spandi segound la lèi de sa naturo.

En plaço de trenca li branco deja ramudo pèr ié faire un insert mal-eisi, servo lou plant abou-rièu, n'ajudo l'espandimen e la flouresoun, segound l'engèni de sa raço.

Aquelo metodo es vivènto, dóumaci li mejan qu'emplego soun pres sus la naturo, au bèu mitan de la vido vidanto.

Camino à cop segur, lis iue sèmpre dubert, en s'apielant à cade pas sus tóuti li bònis ajudo que ié semoundon lis ome o lis evenimen. Liogo de counsidera l'enfant coume un masset d'estam que pòu, d'un cop, prendre la formo d'ou mole, lou regardo coume un sujèt vivènt que se dèu tremuda d'esperéu.

Lou meiour sistèmo d'educacioun es pas lou que sèmpre countrario li dispousicioun naturalo dis enfant, mai aquéu, qu'emé prudènci, li reviéudo, li descadeno, lis alargo : aquéu qu'apren à l'enfant à trouba d'esperéu li resoun de touto causo.

Dins aquéli trobo se pren toujour plesi. Acò 's uno lèi de la vido : l'acioun que meno au prougrès congréio lou bonur.

Lou pichot païsan qu'entènd parla à l'escolo de tóuti li causo de soun endré, dins la lengo de si rèire, amo l'escolo coume un autre oustau siéu e lou mèstre, coume un segound paire.

ART I.

RESULTAT PÈR LA LENGÔ.

I. Pèr lou Francès.

Estènt, lou francès, la lengo ouficialo, se coumpren que lou proumiè resultat que se degue deman-

da à-n-uno metodo nouvello siegue de faire apren-
dre lou francès.

Tout aquest libre es pèr dire que fau garda
preciousamen nosto bello lengo cantarello, mai,
pamens, devèn recounèisse, qu'à l'ouro d'uei,
sarié pas juste d'éstre d'acò talamen afelibri que
l'on troubèsse rèn de bèu, rèn de bon, rèn d'utile,
en foro dóu provençau.

Se voulèn èstre resounable, se devèn countenta,
au mens pèr aro, de prouclama li service que
nosto lengo felibrenco pòu rendre pèr l'ensigna-
men de la lengo patrialo.

Avèn esplica tóuti lis avantage que se n'en pòu
tira pèr l'ourtougráfi, l'estile, la coumpousicioun e
meme la prounounciacion.

N'en diren encaro un, e di majourau, que sarié
d'enrichi e de reviéuda la lengo óuficialo.

Nosto bello e caro lengo franceso, enterin que
la signolon e l'esmérón, ié levón toutó sa coulour
e tout soun parfum terradouren.

Pèr pau qu'un mot garde encaro de-vers éu
quauco redoulènci di tèms ancian, zòu! lou bouton
de caire o l'escoubon 'n foro.

Aussi, quouro i'an trenca tóuti li liame que
l'estacavon à soun passat, la pauro lengo toumbo
lèu anequelido e mourtinello.

Deja, quouro a besoun d'un mot nouvèu, se vèi bèn que lou pòu plus tira de soun founs, amor que lou vai demanda i voucabulàri fourestié dis Anglés o dis Alemand.

Es lou pople soulet, que fai la lengo vivèto, acoulourido, cantarello. Es à-n-éu que fau ana demanda li mot estadis que pinton coume d'ima-ge li situacioun diverso de la vido.

E lou pople li saup dire, aquéli mot, rèn que dins sa lengo meiralo. Ah ! se la sorre d'ou Nord sabié s'aprouvesi dins li tresor de la Countesso, quèti richesso ié troubarié, que farien trelusi soun mantèu !

II. *Èr la lengo d'ou Pais.*

A chasque aucèu
Soun nis es bèu.

Touto amo bello escaris la lengo de soun brès :
« La lengo d'ou brès, disié Aubanel, s'oublido jamai. Lou parla de la bailo e de la maire restoun-tis toujours emé delice au cor, pèr se souveni e pèr ama. E l'aman nosto lengo, d'oumaci nous dis vertadieramen e poulidamen li causo d'ou caire nadau ; douço vo energico, l'aman, d'oumaci nous

parlo de noste cèu en flamo, de nòsti ro crema, e dis òulivié pale e di mióugranié esbléugissènt, di crau nuso e mudo e di pinedo cantarello. L'aman nosto lengo, dòumaci, mies que ges d'autro, a de mot pèr miraia nòsti flume argentau e nosto mar bluio, la gráci de nòsti chato, l'ardidesso de nòsti jouvènt, e sa parladuro es à nòsti bouco coume se bequetavian un fres rasin. »

« Sigués riche o paure, prouclamo lou grand Maianen, trouvas-vous soulamen à dous cènt lègo d'eici : se, pèr asard, un jour, entendès, dins uno foulo, parla quaucun coume à voste endré, coume vai que vous reviras, e que vous avanças, e que venès toupal l'individu que parlo, e que ié demandas, tout-d'un-tèms, de mounte es, e que, s'èu vous respond emé li mot de voste endré, vous sentès espeli uno lagremo à la parpello, e vesès boulega dins vosto souvenènço tóuti aquéli causo que soun la pouèsio e que soun lou bonur ? »

Se, d'aquelo lengo, lou mèstre parlavo à sis escoulan emé respèt e amiracioun, l'amour qu'avien deja pèr elo, devendrié bèn lèu uno adouracioun.

Quouro l'aurié après que la parladuro, que vuei regreio en pouèsio à la voues di felibre, àutri-fes

fuguè glouriouso emé li cant di troubadour, l'enfant se sentirié fièr de se n'en saupre servi, e, bessaï, qu'à soun tour, la farié restounti, pèr canta 'mé de paraulo sourgentado de soun cor, la bëuta de soun païs e la glòri de si rèire.

Es esta remarca que, dins l'ensignamen, la metodo regiounalisto voulié 'mplega lou prouvençau tout-just coume un simple estrumen pèr mies aprendre lou francès.

Mai se se capitavo que, dins aquel usage, l'òutis s'alisquèsse e se perfeciounèsse, quete mau ié veirias?

L'ambicioun dóu prouvençau estént pas de prendre la plaço dóu francès mai de l'ajuda, s'acò fasènt, s'apuravo e s'apoulidissié, recamparié que la recoumpènso justo dóu bon secours qu'aurié douna.

Sarié 'n bonur pèr li dos lengo de s'afina ensèn, l'uno pèr l'autro.

Amor que n'en coustarié tant gaire, perqué se negligentarié tant bëu proufié?

ART. II.

RESULTAT PÈR L'INDIVIDU E PÈR LA SOUCHETA.

Li regiounalisto, emé li remembre d'ou passat e l'eisèmples di rèire, bouton dins lou cor d'ou pichot escoulan l'amour de la patrio e de t'outi li causo de l'oustau.

Sabon que pèr aprendre à l'enfant ço qu'es bèn e ço qu'es mau, fau trouba aquéli mot pivelaire que fan naisse dins l'amo de resson misterious, coume se ié revihavon la counsciènci de touto uno raço.

Estènt dounado, coume volon, dins la lengo meiralo, que l'enfant a begudo emé lou la, li leiçoun mouralo s'estacon à si mesoulo e fan pièi vertadieramen la règlo escrèto de sa vido.

Es coume pèr la religioun : se p'ou pas mies respondre à ço que demando lou cor e la resoun di Prouvençau, qu'en i'ensignant la religioun de si rèire que, vengudo de Diéu, s'es, despièi tant de siècle, armounisado, coume se p'ou pas mies, emé li naturo e lis endré.

Rèn qu'en fasènt, dins lis escolo, à la lengo de l'oustau, la plaço que se merito, se rendrié i parènt uno grosso part de sa legitimo autourita.

L'enfant que saup e qu'estimo que lou francès, quouro arribo à l'oustau, trobo rên à-n-aprendre de si gènt que sabon pas aquelo lengo. Bèn mai, se cresènt d'uno autro raço que li pàuri pacan que i'an baia la vido, fai lou moussu e s'aviso de douna lou toun.

Mai, se l'escolo prenié pèr pres-fa d'ensigna la lengo, l'istòri, lis eisèmples di rèire, aqui subre sèmpre li parènt sauprien quicon de mai que si pichot, quand sarié que la significacioun d'un mot, d'un usage, d'uno tradicioun.

Ravi de li vèire assabenta de ço que i'aprendrié lou mèstre, l'enfant, dins soun oustau, troubarié, à l'entour de si gènt, gau, proufié e bonur.

Es ansin qu'emé la lengo, li regiounalisto mantènon lou goust di vièis us e dis antiqui vertu de la raço.

Dins li leiçoun d'istòri, noun pas semoundre, coume se fasié antan, rên que lou raconte di gràndi bataio e lou noum di grand chaplaire d'ome, fan vèire, éli, que la prousperita di pople vèn pulèu di triounfle pacifi de la sciènci e d'outravaï que di batèsto feroujo e mourtifèro.

D'aque biai, decernènt li joio de l'istòri à-n-aquéli que rendeguèron li pu vertadié service à

l'umanita, coungreion dins lou cor de l'enfant la noblo ambicioun de merita, pèr d'obro bono, grando e utilo, que soun noum siegue un jour escrincela sus la listo ufanouso di benfatour de soun païs.

COUNCLUSIOUN.

LI DOS PATRIO. — LI DOS LENGU.

I. *Li dos Patrio.*

En Franço, chasque ome a dos patrio : la grando e la pichouno.

La grando, es aquelo qu'a lou dre, à l'ouro d'ou dangié, de counvida t'outi li jouvènt soute soun drapèu; la pichouno, es lou vilage ounte sian nascu, ounte passan nosto vido, ounte vendren dourmi noste darrié som, à l'oumbro de la crous benesido qu'assousto deja n'osti rèire.

En-liogo de s'oupausa l'uno à l'autro, aquéli dos patrio se coumpléton e s'enliamon.

Soulet, l'amour de la pichouno patrio, p'ou faire coumprendre à l'ome lou devouamen p'èr la grando.

N'i'a qu'an di que, p'èr unifica la Franço, faudrié impausa l'unifourmita i prouvinço p'èr li bèn

aparia e passa lou rastèu de tout caire pèr bèn tout nivela.

Acò, pèr li regiounalisto, sarié la mort de la gràci e de la bèuta, qu'iston dins la varieta.

E qu'es de besoun de priva nosto bello França di richesso òuriginalo de cado prouvinço, de se faire d'enemi di poupulacioun persecutado e desgounfounado d'aquelo façoun?

Leissen en tóuti sa lengo, si tradicioun, soun biais, soun coustume, si cansoun que meton dins cade terraire uno tant agradivo diversita.

En Prouvènço, mai que pertout, se devon serva li liberta e li franqueso d'aquelo terro ilustro qu'es jamai estado counquistado, mai que s'es fédèrado libramen dins un pantai de glòri, dins un raive d'amour.

Charrant d'aquéli afaire, lou Mèstre disié, à la Santo-Estello d'Albi, en 1882:

« Li cors celèste, que viron e se movon tant magnificamen dins l'immensita de Diéu, soun soumés, lou sabès, à dos forço majouralo: l'uno que li bandis à travès de l'espàci coumé la péiro d'uno foundo, l'autro que li retèn e lis entiro vers soun cèntrè. Dòu contro-pes d'aquéli forço

nais l'ordre miraculous que régno dins lou cèu, nais eternalamen l'armounio d'ou mounde.

« Li soucieta umano soun soumesso tambèn à dous balans countràri, que soun lis elemen de soun prougrès e de sa vido: soun, aquèli balans, lou besoun d'unita e lou besoun d'independènci. E d'ou legislatour la suprèmo sagesso estarié, m'es avis, à trouba l'equilibre que d'eu contro-pesa e manteni d'acord l'independènci e l'unita, à coumpli en un mot la lèi de Noste Segne: *sicut in cælo et in terrâ*.

« L'unitarisme, éu, s'uno fes a lou vanc e que r'en noun l'arrèste, vès, passo l'aplanaire sus t'outi li clouquié, sus t'outi li clapié, sus t'outi li courage; e, tenènt ges de comte ni dis usage, ni de l'istòri, ni de la lengo, ni d'ou climat, v'ou faire t'outi béure à la memo coucourdo, vous chanjo pau à pau la nacioun en troupèu; piéi un jour, v'en un moustre que p'ou dire, en vesènt l'aplatissement de t'outi: « Voudriéu que lou mounde n'aguèsse qu'uno tèsto p'èr pousqué la sega. »

« L'estrèmo independènci n'es pas mens dangerous; car, fautò de gouvèr e d'unita de visto, uno nacioun p'ou s'estrassa, p'ou se desmesoula dins la guerro civilo, s'embreniga e s'avalì.

« D'è la coumbinesoun d'ou lèi unitari emé l'independènci qu'es necessari à l'ome, sourтира

dounc, ieu crese, la digneta pèr tóuti, la liberta, la vido, e la varieta dins l'armounio. »

Se li felibre e li regiounalisto creson d'avé trouba un sistèmo d'educacioun que, sènso pourta tort à la grandio patrio, fague flouri li bèuta de la pichouno, es pèr éli un devé de n'en faire, au mens, uno esprovo.

Dins quàuquis escolo, s'es bèn assaja quicon, mai trop à la chut-chut.

Perqué se farié pas, en plèn trelus, uno es-
periènci ouficialo, coumplèto e decisivo ?

N i a qu'an agu l'idèio de metre en brande, pèr aquelo estiganço, li deputa e li senatour e de demanda au Menistre de prendre l'iniatiavo.

Queto necessita de desrenja tant de mounde ?

Pouden pas faire nòstis afaire soulet ? Se coumençavian tant soulamen d'un pau reüssi, veirias se tóuti li gènt d'ou Gouvèr sarien pas li bèu proumier à pica di man e se manigançarien pas encaro pèr nous faire encreïre qu'es éli qu'an tout gaubeja !

Coume cresès qu'a fa lou Mèstre pèr mena tant bèn tóuti sis entre-presso ?

A soun eisèmplo, l'Escolo Gastou-Fèbus, que beilejo emé tant d'inteligènci e d'ardour lou conse d'Ourtès. En Adrian Planté, sèmblo qu'a devina lou secrèt !

Li capoulié de l'Ensignamen podon qu'èstre favourable à-n-aquéu proujèt, éli que reclamon lis Universita regiounalo e qu'an de-longo empura li revieüre loucau.

L'obro pòu èstre assajado : es l'ouro de l'entamena.

Cresès que s'atirarié pas l'estimo e lou respèt de tóuti, uno armado pacifico d'ome qu'aubourarien lou drapéu de sa prouvinço, en ié metènt dessus aquèsti bèlli paraulo : « Es ma maire, iéu, la vole apara » ?

II. *Li dous parla.*

Quasimen tóuti li lengo an dos formo : la formo natūralo e la formo literàri.

I'a la lengo dóu cor e la lengo de l'esperit, la lengo famihiero e la lengo óuficialo, aquelo que se parlo em' aquelo que s'escríeu.

Lou bilinguisme es censa la lèi generalo de tóuti li ciéuta de l'Europo.

Lou latin, lou sabèn, avié 'no formo pouputàri em' uno formo literàri.

Lou proumié parla que lalejo l'enfant sus li geinouï de sa maire, l'a jamai estudia. L'apren

tout simplamen coume la bouscarlo apren lou siéu, en l'ausissént de si parént que lou charron naturalamen sénso lou coumplica ni lou farci d'un tramblamen de réglo gramaticalo.

Queto escolo a semoundu un paraulis tant bèn grana au galoi Brisquimi ; à Charloun, lou pouèto-païsan dóu Paradou ; à Reynaud, de Vagueiras ; à Toumas Dàvi, de Vilo-Novo ?

L'enfant reçaup, emé la vido, l'engèni de sa lengo que ié fai coumprendre d'istint tóuti li mot li pus escrèt que despouténton li saberu, e ié douno lou meravilhous poudé de n'en crea de nouvèu, quourò n'a de besoun.

La lengo naturalo es l'obro majo d'uno raço, es lou libre de sa vido que tóuti countribuiisson à l'enrichi : li pacan autant bèn que lis artistico.

La lengo naturalo es lou flume misterious que, travessant li siècle, rebalo li souspir e li cansoun di generacioun que passon : aquéu que se i'abéuro coumùnio à l'amo di rèire, se rejuvenis dins li sourso memo d'ounte sourtèn.

La lengo naturalo sarié, se voulès, uno planto de colo que vèn en pleno terro, ufanouso e redoulènto. Pòu uscla lou soulèu, pòu boufa lou vènt-terrau : si racino, que van founs, sèmpre la ténon fermo e vigourouso, perqué pouson, enjusqu'au ro òunte s'agripou, l'umide que la reviscolo.

De quant se n'en fau que siegue ansin la lengo literàri, la lengo escricho, la lengo óuficialo ?

Es, elo, uno planto de jardin, qu'an derrabado dóu terraire ounte es nascudo, pèr l'embarra souto de vitrage e ié douna, à forço de la travaia, uno oulour pu mistouno, de coulour pus esbrihaudanto.

De la flour simplo e sòuvajo, se n'en fara, belèu, uno bello flour di doublo, mai d'aquéli, pecaire ! acò se saup, que podon plus grana !

Sèmblo-ti pas qu'aurié, desenant, d'acò de la flour doublo, nosto lengo de Franço qu'a pourta tant de cap-d'obro despièi lou grand siècle XVII^{en} ?

Bèn rejouncho dins si diciounàri, encadenado pèr si gramatico, n'ïa que dison qu'a plus la forço de coungreia d'esperelo de mot nouvèu.

Aquelo lengo artificialo, li Prouvençau la sabon pas de neissènço, fau que l'aprenon à l'escolo o dins li libre. Pèr éli, es uno lengo de counvencioun e de memòri.

En faci d'aquéli dous parla, coume anan èstre pèr faire ?

Se sian de bon Francés, i'a pas d'engàmbi, devèn parla, segur, la lengo de tòuti li Francés. Acò 's

necite pèr l'unita de la patrio e l'unioun de tóuti sis enfant.

Mai aior, que faren dóu parla de nòsti rèire, que nous es tant eisi pèr dire ço qu'avèn dins nosto amo ?

Li dèz milioun de Francès que, Diéu gràci, gardon encaro, dins sis endré, la lengo que l'age mejan veguè tant glouriouso e tant calignado, fau-ti, que, pèr bèn servi la patrio, la meton, aro, de caire ?

Paure de nautre, coume parlarien nòsti Prouvençau se ié raubavon tóuti aquéli mot que, fignou-la pèr tant de generacioun, an fini pèr s'ajusta, coume un bèu vèsti, à soun biais em'à sa mesuro ?

Es-ti pas lou pouèto de Maiano que nous disié, un jour, qu'en Prouvènço, la naturo, elo-memo, parlo que prouvençau, despièi l'òulivié di pendis enjusqu'au pin dis auturo, despièi la cigalo di coumbo enjusqu'au roussignòu di bouscas ?

S'acò 's ansin, lou pouèto qu'aurié perdu lou secrèt d'aquéu lengage, coume coumprendrié la cansoun de la naturo, e coume farié, pièi, pèr nous la retraire ?

Amor que nòsti maire nous baion, sèns argent,

un parla tant requist, e que la patrio, de soun cousttat, nous fai aprendre dins sis escolo uno lengo tant utilo, perqué, coume de bon Francés e de bon Prouvençau, li parlarian pas tóuti dos ?

Tant que lou pople avié gaire d'estrucion, lou pouëto, pèr èstre coumprés d'eu, ié poudié parla rên que dins sa lengo naturalo.

Pèr èstre entendu de sa maire e di gènt de soun endré, Roumanille escrigué rên qu'en prouvençau. De soun obro vougué jamai ges douna de traducion franceso, pèr ço que li siéu n'avien pas de besoun, e que lis autre, bessai, l'aurien pas pres goust.

Li cap d'obro de Mistral fuguèron tant bêu, tant luminous que meritèron d'escandiha noun soulamen sus la Prouvènço, mai sus touto la terro de Franço. Lou Mèstre adounc n'en fagué, en proso franceso, uno traducion que doné l'envejo, en forço gènt, de li legi dins sa lengo vertadiero. Se lou pople saup, aro, lou francés, li sabènt e li letru, grâci à-n-éu, an après lou prouvençau.

Desenant, dins noste gai Miejour, ounte tóuti sabonsidos lengo, lou pouëto pòu avé dous canta.

Gardant la mèmò tramo, pòu retipa dous cop

lou meme tablèu, sènso se coupia, emé de detai e de coulour que respondon à l'engèni de si dos patrio.

Aquelo obro artistico que l'evolucioun linguistico coumenço tout-just de rëndre poussiblo, es estado assajadò l'an passa

Avans d'outeni li lausié d'or de nòstis Acadèmi miejournalo, emé li lausenjo di journau de Franço, de Belgico, e d'Itali, lou pouèto d'Estello avié reçaupu d'ou grand Mistral aquesto apreciacion que vau mai que tout :

« Voste remarquable pouèmo es uno flour d'ideau ensertado emé forço gaubi sus l'aubre felibren.

« Sabès qu'à-z-Ais, dins lou terraire, se rescontro, au printèms, de tulipan coulour d'or que vènon tóuti soulet.

« Vosto creacion, gràci à l'entousiasme que tout-de-long l'acoulouris e l'aflamo e l'enauro, me fai l'efèt à iéu d'aqueli tulipan enrichi pèr la culturo que, triounfalamen, s'expandisson dins li jardin.

« Crese que, se publicas l'obro, reçauprès en amiracion la recompènso degudo. »

Pouèmo prouvençau e pouèmo francés, flour de colo e flour de jardin, pèr lou Mèstre, soun tóuti dos de flour d'or !

Aquel ideau de bilinguisme que, pèr aro, nous parèis lou soulet veramen poussible, countentara belèu pas li pantaiaire que veson l'evolucioun marcha vers l'unita definitivo.

Es verai que la lengo d'oï e la lengo d'o soun censa coume dous riau bessoun, sourti d'uno memo maire.

Quau empacharié que se venguèsson, quauque jour, tourna-mai foundre ensèn. pèr faire plus qu'un flume majestous ?

Acò, diren, es lou secrèt de l'aveni !

Coume que vire lou destin, nous rèsto toujours, pèr aro, un devé majourau qu'es noun soulamen d'empacha quau que siegue d'estoufa, sènso proufié pèr l'autro, uno di dos lengo que dounon tant de vido e tant de bèuta à noste país, mai encaro de li manteni vivo, tóuti dos, pèr que poscon adurre chascuno sa part de richesso à l'eiretié de deman.

Dins un cap d'obro inmourtau, lou pu grand di Prouvençau nous rapello que :

... coume au Rose la Durènço
Pèrd à la fin soun escourrènço,
Lou gai reiaume de Prouvènço
Dins lou sen de la Franço à la fin s'amaguè.

Mai apound quatecant, pèr que degun l'oublide,
la grand paraulo proufètico que lou « darrié rèi »
de nosto Prouvènço, coume èro pèr mourì, diguè
à la patrio novo :

« Franço, emé tu meno ta sorre !
Gandissès-vous, ensèn, alin vers l'aveni,
Au grand prefà que vous apello...
Tu siès la fòrto, elo es la bello :
Veirès fugi la niue rebello
Davans la resplendour de vòsti front uni !

Ansìn siegue : es noste darrié vot, noste pu bèl
espèr !

VI :

Aix, le 20 juin 1906 :

Le Rapporteur,

R. BONAFOUS.

VII :

Aix, le 10 juillet 1906

Le Deyen,

L. DUCROS.

VU ET PERMIS D'IMPRIMER :

Aix, le 10 juillet 1906

Le Recteur de l'Académie d'Aix,

F. BELIN.

ERRATA

Pajo 5; ligno 2: en placo de *prougram* faulegi *prougrame*

» 8;	» 1:	» »	<i>pu</i>	» »	<i>pus</i>
» 9;	» 8:	» »	<i>tout bèn just</i>	» »	<i>tout-bèn-just</i>
» 14;	» 10:	» »	<i>dou</i>	» »	<i>dou</i>
» »	» 24:	» »	<i>rendre</i>	» »	<i>rèndre</i>
» 16;	» 23:	» »	<i>zou !</i>	» »	<i>zôu !</i>
» 17;	» 2:	» »	<i>à-noun-rèn</i>	» »	<i>à noun-rèn</i>
» 19;	» 3:	» »	<i>vièure</i>	» »	<i>vièure</i>
» 20;	» 9:	» »	<i>pendo</i>	» »	<i>pèndo</i>
» 24;	» 22:	» »	<i>semblo</i>	» »	<i>sèmblo</i>
» 25;	» 14:	» »	<i>oublida</i>	» »	<i>òublida</i>
» 32;	» 16:	» »	<i>rendre</i>	» »	<i>rèndre</i>
» 6;	» 19:	» »	<i>à consta</i>	» »	<i>à coustat</i>
» 43;	» 7:	» »	<i>soulèu</i>	» »	<i>soulèu</i>
» »	» 22:	» »	<i>fucitoun</i>	» »	<i>fucitoun</i>
» 52;	» 7:	» »	<i>que noun-sai</i>	» »	<i>que-noun-sai</i>
» 53;	» 1:	» »	IV.	» »	V.
» »	» 3:	» »	<i>souvènti fes</i>	» »	<i>souvènti-fes</i>
» 56;	» 4:	» »	V.	» »	VI.
» 57;	» 12:	» »	<i>sujet</i>	» »	<i>sujèt</i>
» 58;	» 1:	» »	<i>secret</i>	» »	<i>secrèt</i>
» 68;	» 17:	» »	<i>de founs</i>	» »	<i>de-founs</i>
» 69;	» 5:	» »	<i>régional</i>	» »	<i>(régional)</i>
» »	» 13:	» »	<i>fa à</i>	» »	<i>fach à</i>
» 71;	» 15:	» »	<i>congrèio</i>	» »	<i>coungreio</i>
» 72;	» 6:	» »	<i>être</i>	» »	<i>èstre</i>
» 84;	» 3:	» »	<i>sénso</i>	» »	<i>sènso</i>
» »	» 27:	» »	<i>reviscolo</i>	» »	<i>reviscoulo</i>



TAULO

AVANS-PREPAUS.....	VII
--------------------	-----

PROUMIERO PARTIDO

L'ESCOLO AU XIX^e SIÈCLE

CHAP. I. — SI PRINCIPE PROUMIEREN	I
CHAP. II. — SOUN PROUGRAMO.....	5
CHAP. III. — SI RESULTAT.....	9
CHAP. IV. — SI DECO.....	18

SEGOUNDO PARTIDO

LA PEDAGOUGIÒ REGIOUNALISTO

CHAP. I. — SI PRINCIPE	23
CHAP. II. — SIS APLICACIOUN PRATICO.	
<i>Art. I. — Aplicacioun à la Lengo. — La Metodo Saviniano.</i>	
1. Pèr aprendre à legi.....	28
II. Pèr counèisse l'ourtougràfi	31

III. Pèr reteni li mot	33
IV. Pèr courregi lis idioutisme	36
V. Pèr aqueri l'estile	38
<i>Art. II. — Aplicacioun pu generalo.</i>	
I. L'Istòri de la Lengo e de la Literaturo...	42
II. Lis Obro de literaturo.....	43
III. L'Istòri loucalo.....	44
IV. La Geougrafio	50
V. Li Sciènci de la naturo.....	53
VI. L'Art regiounau.....	56
VII. Li Jo. — Li Fèsto	58
CHAP. III. LI LIBRE	63
CHAP. IV. LI MÈSTRE	67
CHAP. V. — SI RESULTAT	70
<i>Art. I. — Resultat pèr la Lengo.</i>	
I. Pèr lou francès	71
II. Pèr la lengo d'ou païs.....	73
<i>Art. II. — Resultat pèr l'Ome e la Soucieta.</i>	
	76

COUNCLUSIOUN

I. LI DOS PATRÏO.....	79
II. LI DOUS PARLA	83

GRANDO EMPREMARIÉ PROUVENÇALO
VILO-DIËU - VEISOUN (VAU-CLUSO)

1-3090 - 3



The R.W.B. Jackson
Library
OISE

944.9 A931H v.4 c.1

Aurouze # Histoire
critique de la renaissanc

OISE



3 0005 02023500 1

944.9

A931H

v. 4

Aurouze

Histoire critique de la
renaissance méridionale au
XIX^e siècle

DATE

ISSUE

944.9

A931H

v. 4

Aurouze

Histoire critique de la renaissance
méridionale au XIX^e siècle

